

Ebiziba Ebifumukire
Jeffersonville, Indiana, USA
Okwamushanju 26E, 1964

1 Ka tushabe. Mukama, hati nitwikiriza. Nitwikiriza Omwana wa Ruhanga, kandi, kurabira omuri eki, nitwakiira Amagara Agatahwaho okurabira Omuriwi. Hati twagaruka kuteerana, eihangwe eri, nimmanyisa omwebazyo ogu, ahabwa saaviisi endijjo, Nitukwesiga ahabw'Obutumwa kandi n'ahabw'eki Oraatugambire ekiro eki. Nitukwiriza, Mukama, kandi Tukutegyereize. Kandi Okagira oti, "Abategyereza Mukama baryagarukwamu amaani; batumbikye ahaiguru n'amapapa nk'empungu." Mbwenu nitushaba, Ruhanga, ngu Otuhe ago Maani g'okutumbika ahaiguru, omwabazyo ogu, twaba Tukutegyereize.

Nitukusiima ahabw'abantu aba, kandi n'ahabw'ekibarikumanyisa Ahariiwe kandi n'ekibarikumanyisa ahariiye. Ninkikusiimira, Taata. N'amahunde Gaawe. Kandi ninshaba, Ruhanga, ngu ekiro eki, ngu Nooza Kubeeshuuruurira, omu muringo, ogu barikwetenga. Ku haraabe hariho abarwaire hanu, ka bakire. Ku haraabe hariho okubangaanisa omu mutima gw'omuntu weena; kwihemu, Mukama. Reero otuhe Okubaho Kwawe n'emigisha Yaawe, ahabw'okuba nitubyetenga, Mukama. Niiwe kumarwa kwaitu. Kandi, ahi Otari, titwine eki turikubaasa kukora.

Nitushaba ngu Oyaakiire okusiima kwaitu ahabwa byona ebi Okozire. Omu Iziina rya Yesu Kristo nitutegyereza n'ekihika emigisha Yaawe. Amiina.

Nimubaasa kushutama.

2 Kandi, mpaho, ekiro kya Sande egi omunda hanu, ni-nihafuka, okukira oku haabaire hari ekiro kya Sande ehweire. Nitusiima munonga ab'eishe-emwe bagyenzi baitu abakoreire kimwe n'obwesigwa omu kutamu eki. Nimmya babiri nari bashatu aharibo. Ow'eishe-emwe Mike Egan, naaba nindeeba enyima okwo, kandi ni . . . Ow'eishe-emwe Mike, n'Ow'eishe-emwe Sothmann, Ow'eishe-emwe (niinyikiriza) Roy Roberson, n'Ow'eishe-emwe Woods, kandi n'abo boona, babaire bari ahaifo hanu nibatuutuka, nibagyezaho kukitamu kugira ngu tubaase kutunga Obutumwa obu hati, nari eriizooba. N'ahabw'ekyo, nitusiima.

3 Hati, Sande erikwija akasheeshe, Mukama yaakunda, niinyenda kugiraho saaviisi y'okutambirwa endwara, kushabira abarwaire. Nituza kugitaho ahabwa saaviisi y'okutambirwa endwara, Mukama ku araakunde.

Akasheeshe aka, ndeebire, hariho ekifurumba ky'ebitambaara hanu. Naabishabira. Kandi naanye, obu mwaba nimushaba kandi nimweshongora, naashabiire ebitambaara; mbwenu kandi hanu hariho n'ebindi omwebazyo ogu. N'ahabw'ekyo, ni-nitwikiriza ngu Ruhanga naatambira abarwaire. Obujurizi bw'amaani bwingi munonga bw'okutambirwa ahagati yaitu, n'omu nsi yoona, mbwenu nitusiima ahabw'eki.

Reero naateekateekire, Sande erikwija, ahabw'okugira ngu niinyija kuba ntariho okumara akaanya kakye, kandi tutwire tuhamiire munonga aha kwegyesa kandi okw'Obutumwa, okuhitsya obu nteekateekire nti kikaaba ekintu kirungi kuri nitugiraho sa-saaviisi y'okutambirwa endwara, kushabira abarwaire. Kandi nitwesiga ngu Ruhanga naija kutuha obwire burungi.

4 Hati, baangi omuriimwe nimuteekwa kuvuga mahiro nyingi omwabazyo ogu. N'ahabw'ekyo naaba ningambira ebibiina by'abantu a-ahari Blue Boar Cafeteria, eriizooba, ahu naaba nintungira eby'okurya by'omwabazyo. Abantu baangi barungi, naabawkwata omu ngaro kandi naagaaniira nabo, abantu abu ntakabuganahoga, abaija hanu aha kanisa. Kandi ninsiima ahabw'abanywani nk'abo, kandi niinyenda kubasiima mwena. Bamwe omuribo bacwire entuutu, kandi baatureetera. Kandi omwe atureeteire baketi y'omubisi gw'ebijuma, nari omubisi gw'ebikijo, niinyikiriza ngu nigwo, n'e-n'ebindi. Timurikumanya ekyo eki kirikumanyisa. Kandi omu kasheeshe, nyimukire kandi naashohora aheeru, obumwe aho . . .

5 Akandi kasheeshe habaire hariho ow'eishe-emwe omwe aho obaire ari kubi munonga, ataine ebijwaro n'ebindi, arikwenda ngu nze kumureetera ebijwaro. Naatandika kugyenda, reero haihi nteere entsibo aha baketi y'entuutu eterekire aho. Naagira nti, "Niiwe oreetsire ezi ntuutu?"

Reero yaagira ati, "Ngaaha, tiinyine kakwate nazo. Mbaire ndi hanu butakataagurikaine, kandi obwo zibaire ziri hanu." Kandi abaire ari Ow'eishe-emwe mugyenzi wangye omurungi Ruddell obaire azindeeteire. N'ahabw'ekyo, obwo, ebintu ebyo, buzima nimbisiima.

Billy Paulo yangambira, akaanya kakye akaahwaho, ngu omu bantu aba omwabazyo ogu, baashorooza obuhwezi, ahabwangye. Ni-nimbasiima ahabw'ekyo. Ekyo naaba ntarikwenda ngu mukikore. Nimbasiima ahabw'obweziriki bwanyu, n'ebindi nk'ebyo, kwonka ekyo kibaire kitarikwetaagisa. Kandi, kwonka, Mukama abahemugisha. Niumanya, niumanya, Baiburi neegira eti, "Nk'oku mwabikoreire omuto ahari abo, biri Niinye mwabikoreire."

6 Hati, ntwire ndi nk'orikubagambira, aha Butumwa, butsimba. Kandi ni . . . Abantu bamwe nibabaasa kuba baine ekiteekateeko ngu-ngu nintekateeka ngu Yesu naaza kwija omu kasheeshe nari ekiro eki. Nikwo. Hati, tindikugira ngu Naaza kwija. Kandi, nabwo, Naabaasa kutaija okuhitsya saabiiti erikwija, kandi naabaasa kwija omwaka ogurikwija, naabaasa kwija ahanyima y'emyaka ikumi. Tindikumanya obu Araiye. Kwonka, hariho ekintu kimwe eki ndikwenda ngu . . . burijjo mugumye omu biteekateeko, mugume mwetegwire buri dakiika nari

eshaaha. Mwareeba? Ngu, ku Araabe ataizire eriizooba, Naabaasa kwija nyencakare. N'ahabw'ekyo ekyo mukigumye omu biteekateeko byanyu, ngu Naaza kwija.

Kandi tindikumanya obwire oburikuza kuba eshaaha yangye ey'aha muheru omu nsi egi, n'obu yaakuba ondijo weena omuriitwe. Kandi tihariho n'omwe omuriitwe orikumanya obwire obu Araiziremu. Nawe Wenka, tarikumanya, kurugiirira omu Bigambo Bye; Akagira ati, "Ishe, wenka, niwe Orikumanya obunaku obu Ariija; nangwa n'Omwana tarikumanya obunaku obu Ariija." N'obunaku obu Ruhanga araagarukye Kumutwoherereza. Kwonka tutegyereize Okwija Kwe. Kandi ku Araabe ataizire omu busingye bwangye, Naabaasa kwija omu burakurateho; ku Araabe ataizire omuri obwo, Naija kwija omu burakurateho. Kwonka, ahabwangye, tindikureeba haihi akaire koona akatsigaire. Ninfa . . . Ahariinye, nikibaasa kubaho edakiika yoona. Hati, ekyo tikirikumanyisa . . . Ekyo tikirikumanyisa, hati, ngu noija kureeba eiguru ryahinduka reero buri . . . Okwo tikwo Kwija oku ndikugambaho. Ningamba aha Kutwarwa.

7 Mwareeba, Naija kashatu. Akaija omu Maziina ashatu, g'Omwana. Akaizira omuri tiriniiti; Isheboona, Omwana, Omwoyo Orikwera. Mwareeba, byona ni Kristo ogwo omwe, Ruhanga ogwo omwe, obwire bwona. Hati, nitumanya ngu Akaija kureeta emirimo eshatu y'embabazi; okwiwhaho orubanja, okwezibwa, okubatizibwa n'Omwoyo Orikwera. Byona, omuri Ruhanga, nibihikiirira omuri za ishatu.

N'ahabw'ekyo okubanza, Akaija, kucungura Omugore We. Naija, ogwa kabiri, nk'Okutwarwa, kutwara Omugore We. Naija, ogwa kashatu, ari hamwe n'Omugore We, Omugabe n'Omugabekazi; ahanyima, obwo nibwo abantu baingi bategyereize Okwija.

Kwonka Yaija obunaku obu, haihi tihariho n'omwe kureka abo abeetegwire orikimanya Yaija. Haryabaho okubura kw'abantu. Tibarimanya ekibabaireho. Baryabakurwa, omu kaanya kakye, kandi baryabura. "Bahindurwe omu kaanya kakye, nk'ak'okuhumbya eriisho." N'ahabw'ekyo ekyo mukyeteekateekyere. Kikaaba ekirikutiinisa akasheeshe kamwe kufeerwa ow'orikukunda, hatariho n'omwe orikubaasa kubabona. Tikikaaba kibi munonga kumanya ngu kwaherize kubaho kandi okakufeerwa? N'ahabw'ekyo guma omu kubaho kwa Ruhanga.

8 Hati, saabiiti erikwija, Mukama yaakunda, Orwokubanza orurikwija, saabiiti kuruga aha Rwokubanza oru, Ruhanga ku araasiime, nintwara ab'eka yangye mbagarure Arizona ei bashomera, bwanyima ni-ningaruka.

Hati, tindikuza ebiso okwo . . . tiinyineyo zaasaaviisi zonna z'okuzamu. Haihi tinkaikaraga omuri Arizona. Nimba naagiire ahandi hantu. Nintwarayo omukyara wangye, Orwokubanza orurikwija. Ngarukye hanu ogundi murundi. Niinyija kuruga hanu nze British Columbia. Ngarukye Colorado. Niinyija kugaruka omuri Arizona haihi na Kurisimaasi, kumara edakiika nkye zonka, obwire oburikugasha . . . obundi ebiro bibiri nari bishatu, ab'eka yangye mbate hamwe, ngarukye hanu omu biuumuro bya Kurisimaasi, Mukama ku araakikunde, hanu tugireho saaviisi omu saabiiti y'omwaka musya.

9 N'ahabw'ekyo ndi hanu, haihi, obwire bwingi. Ndi hanu emirundi ikumi okukira aheeru okwo, ahabw'okuba titwine kanisa yoona nari zaasaaviisi zonna aheeru okwo, tihaine eki twine aheeru okwo, n'ahabw'ekyo, omu muringo gwa saaviisi y'ekanisa. Ekyo nikyo kintu kimwe kibi ahari ekyo. Tiinyine ahantu ah'okwohereza abaana kuhurira Obutumwa obu, nk'abaana baanyu oku barikubuhurira hanu, n'a-ahabw'ekyo ekyo nikyo kintu kimwe eki tutaine. Kwonka boona baine amagara marungi okukiraho. N'ekyanda, enshusha y'obwire y'ekyanda, nihootsy, kwonka abaana boona nibareebeka kuba baine amagara marungi munonga. Tindiyo obwire oburikugasha kumanya yaaba hari harungi nari hatari harungi. Nyowe, mba ningyenda oku n'oku, kandi ni-ni-ninteebereza ngu nkazaarwa ndi orikukunda kugyendagyenda.

Omukazi wangye anyeta . . . nimmanya ngu ari hanu, n'ahabw'ekyo ninza kukareeba twaruga omu kanisa, mwena nimumanya. Ekyo nikyetwa ki, omuyaga ogurukuhindahinduka buri kaire, nari omuyaga ogutatebeekaniire hamwe, nari eki kiri kyona-eki kiri kyona, nimumanya, omuyaga ogurukuhindahinduka buri kaire? Nimmanyisa, burijo mba ningyenda oku n'oku, omu bindi bigambo. Kandi hati nyine emyaka makumi abiri-na-eibir, ntaahize, kwonka obundi nteekateeka ngu ndi omugyeniyi omu ka, ahabw'okuba ninteebireza ngu nkazaarwa ndi orikukunda kugyendagyenda.

Kwonka ntegyereize obwire obu turitebeekana omu Nsi y'obutaaho ekiro kimwe. Kwonka hati orugamba rutengire, n'ahabw'ekyo ka tube omu kushaba.

10 Muteebwa, Sande erikwija akasheeshe, Mukama yaakunda, mureete abarwaire baanyu n'abarikubonabona. Mwije kare, mutunge emyanya yaanyu, kandi obundi hariho ekibiina ky'okushabirwa. Nitwija kuha zaakada z'ab'okushabirwa. Ku baraabe bari bakye, titurikwija kuha zaakada z'ab'okushabirwa, bakye ekirikugasha abarikubaasa kukora enyiriri nkye nka ibiri nari ishatu, nari ekindi. Kwonka ni-nitwija obundi kuha zaakada z'ab'okushabirwa, n'ahabw'ekyo obundi nitwija kukikora nk'eshaaha emwe saaviisi y'obutoosha etakatandikire, ei ndikuteekateeka ngu neetandika . . . neebaho shaaha ibiri, ibiri nari ibiri n'edakiika makumi ashatu, nibajia kuha zaakada z'ab'okushabirwa; baigure ekanisa, bagabe zaakada z'ab'okushabirwa Sande erikwija akasheeshe. Reero mureebe ngu timwabura hanu ahabwa . . . Mureete abakundwa baanyu, mubataasyemu. Omu kanisa nihaija kuba hari harungi kandi nihafuka, ku baraabe barwaire, kandi nitwija kukora kyona ekirikubaasika kubashabira.

Mwebare, ogundi murundi, ahabw'obuhwezi bwa rukundo.

11 Mbwenu hati twaza kushoma Ekigambo kya Ruhanga, omwebazyo ogu, kandi mweteguure ahaw'b'ekintu eki ky'Okubaho Kwe kugaruka kutureetera Ekigambo Kye. Hati, nitumanya ngu nitubaasa kushoma ekicweka, kwonka Ruhanga naateekwa kushuurura eishomo eryo. Mwareeba? Nitubaasa kutoorana ekicweka, kwonka Ruhanga naateekwa kushuurura eishomo eryo. Kandi obwo muriyo nimubiikuura omu Kitabo kya Yeremia, eshuura ya 2.

Niinyenda kugamba ngu naashemererwa, Ow'eishe-emwe Lee Vayle, kuba naitwe, ow'eishe-emwe omukundwa omuri Mukama. Kandi nintekateeka hanu, ow'eishe-emwe ogu hanu, tindikubaasa kwijuka eiziina rye, Ow'eishe-emwe Willard Crase. Kandi naareeba ab'eishe-emwe okuruga Arkansas, Ow'eishe-emwe John n'abandi, kuruga Poplar Bluff, n'Ow'eishe-emwe Blair. Kandi, oo, Ow'eishe-emwe Jackson, n'Ow'eishe-emwe Ruddell, hamwe n'abandi baingi munonga abu ntari-ntarikubaasa . . . Kuri nimbaasa kweta eiziina rya buri muntu, kwonka tindikubaasa kukikora, kandi nimwetegyereza. Ow'eishe-emwe Ben Bryant, niimureeba ashutami hanu; niwe ompa amiina obutoosha omu nshonda naaba ni . . . Buri omwe naamanya Ben ahaw'eiraka rye. Ahaa.

12 Itwe, tushutami omuri California obwire bumwe, nkaba nimbuurira Obutumwa ahaw'babantu b'Ababaputisiti eruguru omu ruhanga. Bakaba baineyo eihemera rihango, hamwe n'Ababaputisiti baingi abari nk'ab'ekika ky'ahaiguru munonga. Nkaba ntarikubaasa kuhurira "amiina" yoona ahantu hoona; nimumanya, batinire ngu abakazi bamwe nibaza kusimuura erangi aha maisho gaabo. Reero, ekintu ky'okubanza noomanya, nkareeba amaguru abiri nka batyo, nigeereera ahaiguru omu mwanya, n'emikono ebiri mihang, hamwe n'eishokye eririkwiragura niryeihuuba aho, naateera akaari ati, "Amiina," naagambira ahaiguru munonga atyo. Reero naaranzya enyima, naagira nti, "Ben, waaruga hi?" Buzima akaba naagamba "amiina."

Nindeeba omukazi we naamuranzya, kakyeho. Mpaho, rikye aha ishokye eryo eririkwiragura ririyo nirihwaho, kwonka ekyo tikiine nshonga, nimumanya. Murekye kweraarikirira ahaw'b'ekyo. Eryangye, rikahwaho, obwire buraingwa obuhingwire.

N'ahaw'b'ekyo, hati, muteebwa kushaba.

13 Hati obwo turiyo nituhika aha rubaju rukuru rwa saaviisi, mwijukye, ku turaashome Ekigambo eki, obwo Ruhanga naija kuha omugisha Ekigambo Kye. "Tikirigaruka Ahariwe busha, kureka kiryahikiiriza Ekikigyendereire." Kandi nimmanya, omu kushoma Ekigambo, burijo nimba mpikire. Naashoma Ekigambo, Ruhanga naaha Ekigambo Kye ekitiinisa.

Hati ka twemerere kuha Ekigambo Kye ekitiinisa. Yeremia, eshuura ya 2, omushororongo gwa 12 na 13 omuri Yeremia 2.

. . . iguru 'we, kwata aha munwa ahaw'b'ekyo, (kandi) ogire obwoba bwingi, oshoberwe munonga; nikwo MUKAMA arikugira;

Ahabw'okuba abantu bangye bakozire ebibi bibiri-baanyimwire, nyowe enshuro y'amaizi g'amagara, baayetimbira ebiziba, ebiziba bifumukire, ebitarikubaasa . . . kubaasa kugumwamu maizi.

Ka twinikye emitwe yaitu hati.

14 Ruhanga omukundwa, Ekigambo Kyawe kyaheza kushomwa. Mbwenu nitushaba ngu Ohe ekitiinisa Ekigambo ekyo bwanyima otuhe enfumu nimmanyisa ekiri Kukishusha omwebazyo ogu; nk'oku turikureeba ebiro ebyahingwire, Israeli, nk'eky'okureeberaho, nk'oku Baiburi erikutwegyesa ngu nitubaasa kureeba eki Waabakoreire ku baayorobeire Ekigambo, kureeba eki Waabakoreire ku baagomeire Ekigambo, reero twegye eki tushemereire kukora. N'ahabw'ekyo, nitushaba ngu Ogambe naitwe omwebazyo ogu omu muringo gw'omutaano, kugira ngu tubaase kumanya oku tushemereire kwetwara omu biro ebi, ebi twayegaho akasheeshe aka ebi tutwiremu. Ahakuba nitukishaba omu Iziina rya Yesu. Amiina.

Nimubaasa kushutama.

15 Niinyenda kugamba omwebazyo ogu aha ishomo, kumara o-obwire bukye ahari: Ebiziba Ebifumukire.

Israeli ekaba ekozire ebibi biri by'amaani. Ruhanga akagira ngu bakaba Bamwimwire, Enshuro y'Amagara, kandi beetimbiire ebiziba by'okutahamu amaizi g'okunywa. Hati, ekyo n'ekintu.

Enshonga etumire naateekateeka aha ishomo eri n'ahabw'okuba rikaagira akakwate hamwe n'eki naaba ningambaho akasheeshe aka, eky'obwire obu tutwiremu, hamwe n'Ekygrendererwa eki turikurwanira.

16 Kandi nitureeba Israeli nk'eky'okureeberaho, ngu, eki Ruhanga yaabaire ari, Naateekwa kuguma arikwo ari burijo. Kandi hariho ekintu kimwe kyonka eki Ruhanga arahaire ekitiinisa, ekyo kikaba kiri, omuhanda Gwe ogu Yaateeereireho abantu. Kandi ku baabaire baruga omu muhanda ogwo, obwo Ruhanga akaba ataheebwa kitinisa, reero Ruhanga areetera abantu kureeba enaku ahaw'okureka eki Yaabagambiire kukora, eki kyabaire kiri kyona.

Nangwa Akabaha n'ebiragiyo, "Otakwataho, otakoraho, otarozaho." Atari ahaw'b'ekibi ky'okukikora, kureka ekibi ky'okugomera eki Yaagambire kukora. Kandi burijo tihabaasa kubaho ekiragiyo hatariho ekifubiro ky'ekiragiyo ekyo. Ahabw'okuba, haaba hatariho ekifubiro, obwo, ekiragiyo nikiba kitaine maani kureka kyagira ekiheneso. Ekiragiyo!

17 Hati, nitureeba, ebi baakozire omu bunaku obwo nibireebeka nk'ebirikushushana n'ebi turikukora ebi, ebi abantu b'ekanisa barikukora.

Hati nitureeba ekintu ekirikutangaaza hanu. Nikibaasa kuba nikitangaaza aha bantu bamwe, obu Yaagira ati, "Mukozire, bakozire, beetimbiire ebiziba, ebiziba ebifumukire." Hati, obundi bamwe omuriimwe timurikumanya eki ekiziba kiri. Nibangahi abarikumanya eki ekiziba kiri? Mpaho, haihi mwena. Ku oraabe waakuriire omu iriisizo, noomanya eki ekiziba kiri. Niinyijuka nkanywa obukooko oburikugasha omuri kimwe, ku-kumanya eki e-ekiziba kyabaire kiri.

Mbuuriire aheeru omu ihanga ahu, ahansi y'ekicuucu ky'emiti, ahu waabaire ogira ekiziba kiijwire amaizi maingi aho, g'e-enjura, nimmanyanya, kwonka kikaba nk'ekyamara obwire kakye. Reero-reero obukooko, obwire bw'ekiro, bukaba bukizamu. N'ahabw'ekyo nimmanya amaizi g'ekiziba.

18 E-ekiziba n'o-omwanya, ekintu ekitimbirwe omu itaka, omu mwanya gw'eiziba. Ahu abantu bataine eiziba, obwo nibakora e-ekiziba. Omu bindi bigambo, ekiziba ni tanka ekozirwe abantu nari eiziba erikozirwe abantu omu itaka, eri abantu barima, kutegyeramu amaizi, g'o-okukozesa. Abamwe bagakoresa omu kwozya, kandi abandi nibagakozesa nk'amaizi g'okunywa, hamwe n'emiringo etari emwe, obundi. Obumwe n'obumwe amaizi goona, agu twabaire tutunga, gakaba gari ag'ekiziba. Tukaba tugira ekintu ekikuzire eki twabaire tuzinga, tukyetoorooza, tukyetoorooza, tukyetoorooza, kwhayao amaizi; kikomirweho obubaketi bukye, kwihisayo amaizi omu kiziba.

Mpaho, nitureeba entaaniso emwe aha kiziba hamwe n'eiziba. Hati, ekiziba nikihwamu amaizi. E-e-ekiziba tikirikubaasa kweijuza. Ni-ni . . . Tikirikwesiga. Torikubaasa kwsiga ekiziba. Nikiteekwa kurinda n'okutegyereza enjura erikugwa omu kyanda nimmanyisa omu bwire bw'eitumba, eki kiri kyona ku . . . Emirundi mingo, omu bwire bw'eitumba obu orubaare n'enjura bigwa, obwire obwo amaizi geeshuka omu kiziba. Kandi amaizi ago ku gaba gatagiiremu, obwo to-torikutunga amaizi goona. Goona ni-goona ni . . . gooma. Kandi tikirikubaasa kweijuzamu amaizi. Ekiziba ekimazire obwire tikirikubaasa kweijuzamu amaizi. Nikijuzibwa e-enjura erikugwa.

19 Kandi niinyenda ngu mwetegyereze ekindi kintu aha kiziba. Obutoosha, nooshanga, nari oku kyabaire kiri owaitu, ekiziba . . . Obutoosha enju yamatungo neingana n'enju kabiri, n'ahabw'ekyo obutoosha bakaba batega amaizi agarikuruga aha mutwe gw'enju yamatungo, gaza omu kiziba. Niinyijuka kurungi ekyo kiziba ekimazire obwire ebiso okwo, obu yaabaire . . . obu za-zaapaipu ezirikutwara amaizi nizigataasyamu, nazo, nizigaiha aha nju yamatungo. Nikijuzibwa amaizi agarikuruga aha nju yamatungo.

N'ahabw'ekyo amaizi nigaruga ahaiguru y'enju yamatungo; ahu, amatungo goona garikuba nigaribatiirira omu kibuga kyona ky'enju yamatungo, kandi oburofa bwona bw'omu kibuga ky'enju yamatungo buza aha mutwe gw'enju yamatungo, omu bwire bw'ekyanda. Bwanyima amaizi gaija kandi gabutwara bwona gabwiha aha mutwe gw'enju, gabutaasya omu mureeko ogukozirwe abantu, bwanyima buza omu paipu ekozirwe abantu, aha muheru buza omu kiziba ekitimbirwe abantu. Kandi waaba otaine omuzambaaro, tindikumya eki oine, waaba oine ekiziba. Eego, sebo! Byona n'ebikozirwe abantu, kandi bisiisikaire nk'oku kirikubaasika.

20 Noomanya, tukaba tweta . . . Tukaba twine akenda k'okugyegyenesa ahari kimwe. Oramanyire ekyo eki kyabaire kiri? Kikaba kyetaagisa kutaho akenda k'okugyegyenesa, kuzibira obukooko bwona n'ebintu ebirikuruga aha mutwe gw'e-gw'enju yamatungo, n'omu mwanya ogwo gwona, kandi byeshuka nibiruga omu myanya yoono, biza omu kiziba. N'ahabw'ekyo tukaba tutaho a-akenda k'okugyegyenesa, kuzibira o-oburofa bwona n'ebindi ebi twabaire nitubaasa. Hataraho kubanganisa, ekyo kikaba kitazibira oburofa bwonyini, akenda kakaba kazibira ebikompura bihang ebyabaire bija kandi bikagwamu. Akakooko nikabaasa kugwamu, kwonka amaizi g'ako kakooko gakaba gagumizamu nigagyenda n'agandi maizi. N'ahabw'ekyo, buzima oka-okaba oba oine omuzambaaro ku waabaire ova oine ekiziba ky'oburofa ekimazire obwire burasingwa.

21 Omu biro bikye, orekye amaizi ago gagume aho, kandi nigahinduka ebyagaana. Orekye amaizi gagume omu kiziba, nigahinduka ebyagaana. Kandi nikijuramu e-ebikyere, n'ebihangare, hamwe n'enjoka. Kandi tukaba tubweta "emishundwe," obukooko bukye munonga . . . Tindikumanya yaaba . . . Tiburi oburiirizi, n'e . . . Tindikubaasa, tindikumanya eki waakubaasa kubweta. Kwonka obuntu bukye nibuza omu maizi, obu-obuturikweta emishundwe. Nimumanya eki eri. Nibangahi abarikumanya eki ndikugambaho? Oo, ahabw'enki, buzima, imwe mwena abantu b'ekyaro nimukimanya. Nikijuramu ebyagaana bingi, reero nkunzi z'abyagaana ezi zija nabyo. Buzima nibiija, ahabw'okuba n'abyagaana ebiterami. Kandi ahabw'okuba biterami, bituma obukooko bwaija oburikukunda ebintu ebiterami.

22 Kandi ekyo nikishushanira kimwe nk'amakanisa gaitu ebi. Nintekateeka ngu tutsigireho . . . Kimwe aha bibi by'amaani ebi ekanisa ekozire ebi, nka Israeli ebi ebyo, Ekamutsigaho, Enshuro y'Amaizi g'amagara, kandi baayetimbira ebiziba ebikozirwe abantu. Reero byahinduka obutaaho bw'ebintu byona ebirikukunda amaizi g'omuringo ogwo. Ebihangare, ebikyere, hamwe n'obukooko bw'emiringo yoono obutasemeire oburikureeta endwara, nibukituramu, ahabw'okuba ni tanka ekozirwe abantu. Kandi ebintu ebi nibiguma omu tanka egi, eky'okureeberaho ekihikiire kimwe ebi ky'abantu b'ebigombe byaitu by'amadiini.

"Hati," noogira oti, "Ow'eishe-emwe Branham, ahabw'enki nooteera abantu abo munonga?"

Bishemereire kuteerwa. Nibiteekwa kuteerwa. Mubirugyemu, ahabw'okuba aha muheru biryakora akamanyiso k'enyaishwa. Mwijukye, ago n'Amazima! Biryaba akamanyiso k'enyaishwa. Ekigombe ky'ediini kiriyataahamu. Kiri omu muhanda nikizayo aho hati hati, okugyema, ahabw'obushoborozi.

Reeba omu bugabe bwa Rooma obwa ira. Ekyo buzima nikyo kyabahikize aha kutunga ako kamanyiso ak'okurugira kimwe aha kwikiriza. Mukareeba ngu tihariho omuntu awaabaire naabaasa kugura nari kuguza ataine akamanyiso k'enyaishwa. Akaba naateekwa kukagira.

23 Hariho ebibiina by'abantu bibiri byonka abiraije kuba omu nsi; abo abaine Akamanyiso ka Ruhanga, hamwe n'abo abaine akamanyiso k'enyaishwa. Ebibiina bibiri byonka, n'ahabw'ekyo nooteekwa kugira kamwe ahari obwo. Kuryaba okurugira kimwe aha kwikiriza, a-akamanyiso k'e-ediini, ediini erugire kimwe aha kwikiriza.

Kandi nikiza kugira ekishushani ahabw'egyo nyamaishwa. Twaba nitwega, nitureeba ngu Rooma ekaba eri, niyo, kandi eryaguma eriyo, e- . . . nimmanyisa, enyamaishwa. Nikwo kiri buzima. Tihariho ogundi muringo gwona gw'okukyetegeyerezamu. Rooma!

Kandi Rooma ekakora ki? Ekahindurwa kuruga omuri Rooma enkaafiiri yaaba Rooma y'obwa paapa, kandi yaataho enkora, enkora erikubuga ensi yoona, eyaagyemire buri muntu kuza omuri egyo diini emwe nari kwitwa.

24 Kandi n'ekintu ky'okutangaaza ngu Amerika egi neereebeka aho, kandi neeshusha nk'omwana gw'entaama. Kandi omwana gw'entaama gwine amahembe abiri makye, obugabe bw'eb'yobutegyeki n'eb'yediini. Kandi ahanyima y'akaanya kakye, obu ogwo gwabaire guri omwana gw'entaama, tushangire ngu obwo gukagamba nk'ekijoka kandi gwakoresa obushoborozi bwona obu ekijoka ky'okubanza kyabaire kiine. Kandi Baiburi neetugambira ngu bakagira bati, "Ka tukore ekishushani ahabw'enyaishwa egyo." Ekihushani n'ekintu ekirikushusha ekindi kintu. Kandi nitubaasa kukireeba hati hati ngu, omu mbeera yaayo y'okurugira kimwe aha kwikiriza, ekanisa eriyo neekora Orukiiko rw'Amakanisa g'Ensi, nikyo kishushani ky'obushoborozi bwa Rooma; kandi nizu kugyema aha bantu ekintu nikyo kimwe eki Rooma enkaafiiri yaakozire . . . nimmanyisa eki Rooma y'obwa paapa yaakozire. N'ahabw'ekyo, tihariho ogundi muringo gwona, tihariho ekindi kintu kyona. Kwonka ago nigo Mazima.

Kandi egyo niyo nshonga erikutuma naakiteera omu busingye bwangye, omu bwire bwangye, ahabw'okuba nikiteekwa kuteerwa. Hakabaho okweta, ngu, "Mururugyemu, imwe bantu Bangye 'mwe, mutakaakwatanisa narwo omu bibi byarwo!"

25 Hati, ninshushanisa ekyo n'ebiziba ebi ebisiisikaire, ebirofa. "Niwe Nshuro y'Amagara. Niwe Maizi g'amagara." Kwonka abantu nibagatsigaho Ago, reero beetimbira ebiziba ebirkubaasa kuzamu oburofa bwonka. Ekyo nikyo kintu kyonka ekirikubaasa kuzamu. Kandi ekyo nikyo kintu eki enkora y'ebigombe by'amadiini erikukora; neeyakiira buri kintu ekirikwija kandi ekirikwenda kwegaitaho. Beeteekateekire kukitaasyamu kyaba kiine esente nari kirikubaasa kujwara omu muringo gw'omutaano. N'obu baakuba bari baahi, ahi barikuruga, nibabaakiira, n'obu kiraabe.

26 Hati nitugaruka, tureeba, ngu, akamanyiso aka k'enyaishwa akaakozirwe hanu. Amerika, ni, namba ikumi na ishatu. Ekatandika n'amatware ikumi na ashatu. Ekaba eine ebendera eyaabaire eriho enyonyoozi ikumi na ishatu, eminyarara ikumi na ishatu. Kandi nangwa neereebeka n'omu kitabo ky'Okushuururwa eshuura ya 13. Kandi Amerika etuura eri omukazi, ari aha sente zaitu z'ebyma. Nangwa n'omutwe gwa Buhindi, aha sente z'ekyma, hariho ekishushani ky'omukazi. Ekyo nitukimanya, nitumanya ebyafaayo byakyo. Buri kintu, Ekide ky'Obusingye, n'ebindi byona, obusingye . . . Ekishushani kyeibumba ky'Obusingye, buri kintu, n'omukazi. Omukazi; namba ikumi na ishatu. Mwareeba? Hati, ni-ni kirungi munonga kureeba ebintu ebyo.

27 Kandi hati ahabw'okushuururirwa okwarugire ahari Ruhanga nkaragura, nimmanyisa okworekwa omu gwa 1933, ngu ebintu mushanju biryabaho obwire bw'aha muheru butakahikire. Kandi ngu, kimwe aharibyo, ngu, "Mussolini," owaabaire obwire obwo ariyo naahinduka ngambanyenka, "akaba naaza kuba ngambanyenka. Kandi, nabwo, akaba naaza kutaahirira kandi ashuume eifo Esiopia, kandi akwate Esiopia. Kandi Omwoyo, Akagira ati, 'Aryagisingura."

Tindikumanya yaaba hariho n'omwe omuri baak'aha kaira okitsigaireho omuri tabirinaakuru egi, orikwijuwa ningamba ekyo omuri Redman's Hall eifo hanu obu twabuurira, emyaka mingi, mingi ehangwire. Haine oriho omu kyombeko eki, omwabazyo ogu, okitsigaireho kuruga eifo okwo omuri Redman's Hall eya kare obu naabuurira ekyo, obu baabaire baineyo aba N.R.A, enyima kare okwo omu bwire bw'encuro y'okubanza ya Roosevelt? Ninteekekira ngu tihariho n'omwe orimu hanu. Arimu? Yee, yee, omwe, hariho omwe. Eego, Muky. Wilson, nimwijuka. Omukyara wangye, oshutami enyima. Hatsigaireho babiri, aha b'omu bwire obwa ira omu biro ebyo.

Ekyo, ku bagizire ngu N.R.A. egi niyo kamanyiso k'enyaishwa, nkagira nti, "Tiyo nangwa na busha; teriyo na kakye. Akamanyiso k'enyaishwa tikarikuruga hanu. Nikaruga Rooma. Kandi terikubaasa kuba akamanyiso k'enyaishwa."

28 Mbwenu hati mwijukye ngu ebintu ebi bikagambwa. Akagira ati, "Adolph Hitler aryahika aha muheru ogutarikwetegyerezibwa. Kandi aryarangirira orutaro ahari Amerika. Kandi ngu nibaija kwombeka ekintu eki-eki-ekigumire ky'enkogoto ya simenti, eki baabaire nangwa nibaza n'okutuuramu. Kandi aho honyini Abanyamerika

baryasingurirwaho omu muringo ogurikutiinisa, ahari eki." Kandi kikaba kiri ekisiika kya Siegfried, emyaka ikumi na gumwe batakabaire nangwa n'okutandika kukyombeka. Reero yaagira ati, "Kwonka aryahika aha muheru; kandi Amerika esingye orutaro."

Kandi naagira nti, "Hariho enkora ishatu; Naasizimu, faasizimu, na komyuniizimu." Kandi naagira nti, "Zoona nizija kuhwera omuri komyuniizimu. Russia neija kubimira byona, omuri komyuniizimu."

Kandi naagira nti, "Bwanyima sayansa neeza kuba ey'amaani munonga, omuntu naaza kuba omunyabwengye munonga, okuhitsya obu arijumbura ebintu bingi munonga okuhitsya obu arikora emotoka erikushushana n'eihuri, eryaba eine nk'ekirahuri ahaiguru yaayo, kandi eryaba neetereezibwa agandi maani etari siteeringi." Kandi emotoka egoye bagine.

29 Kandi naagira nti, "Bwanyima emicwe y'abakazi baitu neija kusiisikarira kimwe, okuhitsya obu baraaze kuba ekihemu omu mahanga goona. Nibaza kujwara ebijwaro by'abashaija. Nibaza kuguma nibajuura ebijwaro byabo okuhitsya buzima obu barihika bakaba nk'abajwaire ebijwaro byabo by'omunda, nikyo ekkyo. Kandi, aha muheru, nibajja kuhika aha kujwara eibabi ry'omutiini ryonka."

Kandi ku oraayetegyereze, omu katabo k'amakuru ka Life k'okwezi okuhweire, bakaba bainemu omukazi ojwaire amababi g'omutiini. Kandi ekkyo n'ekiteeteeyi kisyu ky'okujwara omu mwebazyo, nari eganduura, ei bajwara omu mwebazyo; nikireeberana, noobaasa kukirabyamu amaisho, amababi g'omutiini gonka nigo garikushereka akacweka kamwe k'omubiri gwe; kitarikushweka amabega, nari obukoba, ekijwaro ky'okwogyeramu ekitarikushweka amabega, ekicweka ky'eruguru, nikyoreka omubiri. Kandi ebintu ebyo ka bibaireho!

Bwanyima naagira nti, "Nkareeba omukazi naayemerera omuri Amerika, nk'omugabekazi w'amaani nari ekindi. Kandi akaba ari murungi w'okureebwa, kwonka ari mubi omu mutima gwe. Kandi yaareetera eihanga kuteera orutambo, kugyendera aha rutambo rwe."

30 Reero naagira nti, "Aha muheru, Akangambira kureeba Buturukwa-izooba ogundi murundi. Kandi, ku naareebireyo, nkareeba, kikaba nikireebeka, oku kyabaire kiri, ensi ekaba ebarukire. Kandi ahu amaisho gangye gaagarukiire kureeba, tihaine ekyabaire kiriho kureka ebiti, n'a-n'amabaare agarikucumbuukamu omwika agaabaire gabrukire garugire ahansi omu itaka.

Kandi ebi bikaba biri eby'okubaho ensi etakahweireho. Kandi bitaano ahari mushanju byaherize kubaho, omu myaka makumi ashatu na ishatu. Nikyo ekkyo, turi omu bwire bw'aha muheru!

Kandi obwire obwo nkajumiirira egoye nkora y'ebigombe by'amadiini. Kandi na hati ninkiikiriza, ekiro eki, ngu n'ekiziba kya kazambi, ngu n'omwanya ahu oburofa burikuteeranira. Tindikubaasa kwikiriza ngu Ruhanga naabaasa kuta ekintu nk'ekkyo omu Kanisa Ye, ahabw'okuba neeteekwa kuzaarwa Omwoyo wa Ruhanga kandi ahanyima eshemezibwe etakabaasize kwetwa Eye. Nitubatizibwa kutaaha mu Mubiri gwa Kristo gw'enaama, kurabira omu kubatizibwa kw'Omwoyo Orikwera.

31 Eego, buzima egi nkora y'ekiziba n'eky'okureeberaho ekihikire ky'ekigombe ky'ediini. Omuntu w'obwengye ashemereire kureeba, kandi akareka kukizamu na kakye, ahakuba Ruhanga ayorekire omu busingye bwona ngu Naakihakanisa kandi takakoraga nakyo. Ekibiina kyona . . . Obwire bwona omuntu ku yaabaire aimuka aine obutumwa, nka Luteeri, Wesili, n'abandi, na Smith, na Kaluvini, hamwe n'abandi; ku batandikire ebibiina by'amadiini, Ruhanga ekkyo akaba akita hangahari kandi akaba atagaruka kukitaayaayira omu kusisiimuka.

Reeba ebyabaireho. Tihakabahoga bwire na bumwe obu Ruhanga araataware ekigombe ky'ediini, akakikoramu okusisiimuka, tibukabagaho. Kandi, omu byabaireho n'omuri Baiburi, nibyoreka ngu n'oburofa omu maisho ga Ruhanga, n'ahabw'ekkyo tindikwenda kugira akakwate nakyo. Ego niyo nshonga erikutuma naahakanisa. Ningyezaho kwihamu abantu.

32 Turaarikirwe, nk'omuri Israeli, nikwo kiri na hati, kureebera Israeli nk'eky'okwogyeraho. Bo, obwire bwona obu baabaire baguma n'egyo Nshuro, bakaba bari gye. Kwonka ku baabaire batandika kwetimbira ebiziba, enkora ezigunzirwe abantu, obwo Ruhanga akaba abatsigiraho kimwe. Naitwe nikyo Arikwija kutukorera. "Bamwimwire, Enshuro y'Amaizi g'amagara." Okwo nikwo kwetombaita kwa Ruhanga aharibo. "Kukora ekintu eki baabaire nibabaasa kugira bati, 'Nimureeba eki tukozire!'"

33 Hati, omu bwire bw'o-orugyendo rwa Musa; obu Ruhanga, ahabw'embabazi, yaabaire abahaire nabi, yaabaire abahaire Enyomyo y'Omuriro kubeebembera, akaba Agihamize n'obumanyiso n'eb'okutangaaza. Embabazi zikaba zihaire ebintu ebi byona. Nabwo Israeli ekaba neekyenda, ekareeba ebiragiro. Bakanga embabazi, batwara ebiragiro.

Ekyo buzima nikyo bantu barikukora ebiro ebi. Nibanga Ekigambo, batwara enkora y'ekigombe ky'ediini, ahabw'okuba omuri ekkyo nibabaasa kukora eki barikwenda kandi bagumizamu hataine eki babaire. Kwonka torikubaasa kukikora omuri Kristo! Nooteekwa kwija oschemeire kandi ori gye, kugira ngu obe omuri Kristo.

34 Kutsigaho eiziba ry'enshuro, okaza omu nkora egunzirwe abantu nari ekiziba, teekateeka omuntu arikukora

ekyo? Teekateeka aha mbeera z'obwonko by'omuntu orikubaasa kunywa aha iziba ry'enshuro rirungi, kwonka akaritsigaho akaza aha biziba ebitimbirwe abantu ebirimu ebikyere, n'ebihangare, n'emishundwe, hamwe n'ebindi byona omurikyo?

Tikirkureebeka nangwa nk'eky'oburyo kuba ekihikire, kwonka buzima ekyo nikyo abantu bakozire. Batsigireho Ekigambo, obukomooko bw'Enshuro y'amazima ya Ruhanga n'Amaani, kunywa aha biziba, kandi baayekorera ebiziba. Nk'oku baakozire buri, nikwo bakikozire na hati. Nibagira . . .

Akagira ati, "Bakaanyimura." Hanu Akagamba, hanu omuri Yeremia 2:14, nari 13, nimmanyisa. Akagira ati, "Baanyimwire, Nyowe Enshuro y'Amaizi g'amagara."

35 Hati, nitureeba eki ekiziba kiri. Nitureeba ebirikuzamu. Nitureeba oku kikozirwe. N'ekintu ekikozirwe abantu ekirikuruga aha mutwe gw'enju ahu oburofa buri. Amaizi agarikugwa, gahikira aha mutwe gw'enju ahu oburofa buri, kandi goozya omutwe gw'enju kwonka, gashuma ahansi garaba omu mureeko ogukozirwe abantu, garaba omu paipu erikushohoza ekozirwe abantu, gaza omu tanka ekozirwe abantu. Reero oburofa bwona bwerundaanira omwo, hamwe n'o-obukooko oburikureeta endwara, n'ebihangare, n'ebikyere, hamwe n'ebintu eby'aha itaka, nka batyo. Kandi, yetegyereze, n'obukooko obutaschemeire; emishundwe, ebyagaana. Omushundwe tigurikubaasa kutuura omu maizi marungi. Ku gwakuzamu, gakaagwita. Niguteekwa kuba omu byagaana.

36 Kandi okwo nikwo kiri n'ebi biriiririzi bingi ebiro ebi. Timurikubaasa kutuura omu maizi marungi g'Omwoyo Orikwera. Egyo niyo nshonga erikutuma baahakanisiza kimwe Ekigambo, kandi nibagira bati, "Nikyehakanisa. Tikiine mugasho." N'ahabw'okuba nibateekwa kugira ekintu ekiri nk'ekidiba ky'ebayaana ky'okwenyogooreramu. Kihikire.

Okwo nikwo ebikyere, n'ebihangare, n'obwana bw'ebikyere, hamwe n'ebindi nk'ebyo bitwaza. Nibiteekwa kuza haihi n'ekisharara nari ekidiba ky'ebayaana, kubaho, ahakuba n'obuhangwa bwabyo kutuaramu. Kandi torikubaasa kuhindura enyamaishwa otakahindwire obuhangwa bwayo.

Kandi torikubaasa kutuma omuntu yaayetegyereza Ekigambo kya Ruhanga okuhitsya obu obuhangwa bwe buraahindurwe; kandi obuhangwa bwe bwahindurwa kuruga omu ki ari, akaba omwana wa Ruhanga, reero n'Omwoyo Orikwera amutaahamu. Omwoyo Orikwera akahandiika Ekigambo kya Ruhanga!

37 Eriizooba naaba ningamba na munywani wangye murungi, Dokita Lee Vayle, ori hanu hati. Kandi buzima n'otendekirwe omu by'ediini, n'ahabw'ekyo burijo tugiraho-tugiraho okuhaana ebiteekateko kurungi munonga omu Byahandiikirwe. Arabukire munonga.

Kandi rimwe akambuuza eki naabaire ninEEKATEKA aha kamanyiso konyini k'okwijura Omwoyo Orikwera, "N'okugamba omu ndimi?" Hahingwireho emyaka mingo.

Naagira nti, "Ngaaha; ekyo tindikukireeba."

Yaagira ati, "Naanye tindikukireeba," ati, "n'obu ekyo naakyegyesiibwe." Yaagira ati, "Nooteekateeka ngu akamanyiso ni kaahi?"

Naagira nti, "Akamanyiso akahikiire kimwe akarikukirayo aku ndikubaasa kuteekateekaho ni rukundo." N'ahabw'ekyo twatandika kugamba ahari ekyo.

Reero naateekateeka ngu ekyo kikaba kiri kurungi munonga n'ahabw'ekyo naagumya ekyo, "Omuntu yaaba aine rukundo."

Kwonka ekiro kimwe, ndi omu kworekwa, Mukama akangorora. Kandi Yaagira, ati, "Akamanyiso k'Omwoyo n'abo abarikubaasa kwakiira Ekigambo," ti rukundo, nari okugamba omu ndimi, kureka n'okwakiira Ekigambo.

38 Reero Dokita Vayle akaba nangambira, ngu, "Ekyo n'Ebyahandiikirwe," yaagira ati, "ahabw'okuba, omuri Yohaana 14, Yesu akagira ati, 'Omwoyo Orikwera ku Aribaijaho, Aryabashuuruirira ebintu, ebi Naabeegyeise, kandi aryabamanyisa ebirija kubaho.'"

N'ahabw'ekyo nkako aho akamanyiso k'amazima k'Omwoyo Orikwera! Takangambiraga ekintu kyona ekigwire na kakye. Ngu, "Akamanyiso k'Omwoyo Orikwera, n'ogwo orikubaasa kwikiriza Ekigambo, waabaasa kukyakiira."

Habw'okuba, Yesu taragizire ngu, "Omwoyo Orikwera ku ariija, muryagamba omu ndimi." Taragizire ngu, Omwoyo Orikwera yaija, muryakora kimwe aha bintu ebyo. Kureka Akagira ati, "Aryaiha aha Byangye kandi abibamanyise, kandi aryabamanyisa ebirija kubaho." N'ahabw'ekyo ako niko kamanyiso k'amazima k'Omwoyo Orikwera, kurugiirira ahari Yesu We wenka.

39 N'ahabw'ekyo oku kukyamukirira kwona n'ebindi ebi abantu baine kwonka nabwo bakagumizamu kutuura batyo, noobaasa kureeba ahabw'enki nibakikora. Mwareeba, nikihinduka ekigombe ky'ediini, nari ekidiba ky'amaizi agaterami, kandi tiharibaho kigombe ky'ediini ekyakorwa ekita- . . . Ekigambo kya Ruhanga ekihikire. Tikirkubaasa kukikora, ahabw'okuba Ruhanga torikubaasa kutoorana nari kumukoram u ekigombe ky'ediini. Ngaaha, sebo!

Enshonga erikutuma kyabaho, kwata ekibiina ky'abantu abarikubaasa kwikiriza Ekigambo, barekye batandikye ekibiina ky'ediini. Ekintu ky'okubanza noomanya, omu bwire bw'omwaka gumwe nihaba haataahiremu ekibiina ky'Emihiri eki otarikubaasa kugira eki waakora nakyo. Bahamire, n'ahabw'ekyo tihaine ekintu kyona eki orikubaasa kukikoraho. Teri nkora ya Ruhanga. Teriyo, n'ahabw'ekyo nitumanya ngu ekintu ekyo kigwire. Nikihinduka ekiziba, reero niguhinduka omwanya ogu buri omwe arikworobyamu ahari eki, kiri, nari kiriya, kutaasyamu baamemba, nari kwikiriza abantu kutaahamu.

40 Nitushanga ngu, egi nkora ekatandika obwire bumwe, enyima okwo omu biro by'Abaisraeli, obu baabaire nibatimba ebiziba ebi. Kandi hakaba hariho omushaija n'ekibiina ky'Abafarisaayo abaabaire batimbire ebiziba. Kandi bakaba baine omushaija orikwetwa Herode, kandi akaba ari orikurangirira, omutegyeki w'eihanga.

Reero yaashuumma eifo kuhurira omushaija owaabaire atarikushiisha obwire n'ebigombe byabo by'amadiini. Akaba ari nabi. Kandi tihariho nabi n'omwe oragizire akakwate n'ekigombe ky'ediini, kureka bakaba bakyanga. Nabi ogu yaatandika kugira ati, "Mutatandika kugira omu mitima yaanyu muti, 'Twine Abrahamu niwe tatenkuriitwe,' ahakuba nyowe nimbagambira nti Ruhanga naabaasa amabaare aga kugaihiramu Abrahamu abaana."

Reero baareeta omuntu w'ekitiinisa kumuherira. Kandi ogu muntu w'ekitiinisa akaba ayakire mukuru we omukazi, kandi yaamutaasya. Kwonka ogwo mushaija akagambira ki omuntu w'ekitiinisa ogu ku yaamwizire omu maisho? Bakateekateeka ngu naija kworobyamu, reero ngu agire ati, "Hati, sebo, iwe, tunga ah'okushutama harungi hanu. Kandi oshemerere ku . . . Naashemerere munonga kwija kumpurikiza ekiro eki."

Yohaana akaizira kimwe omu maisho ge, kandi yaagira ati, "Ebiragiro tibirikukwikiriza kumushwera." Ekintu ky'okubanza eki yaagambire, akamukabukira ahabw'ekibi kye.

41 Mwareeba, ebigombe by'amadiini nibikora ebidiba by'amaizi g'ebiyagaana ahu omushaija arikubaasa kutuura n'abakazi, kandi n'abo bakazi bakabaasa kutwaza kubi, kandi bakashara amashokye gaabo, kandi bakajwara ebijwaro bigufu munonga, n'ekindi kintu kyona, haza bakeeyeta Abakristaayo.

Kwonka Enshuro y'amazima, Haleluya, y'Amaani ga Ruhanga, tikirikubaasa kugumamu, ahabw'okuba Neekitsindika ekinaga aheeru. "Niinye Nshuro y'Amaizi g'amagara. Bakaanyimuura, kugira ngu beetimbire ebiziba."

Hati, nitusherura, enshuro y'amaizi g'amagara, enshuro y'amaizi g'amagara niki? Twareeba eki ekiziba kiri, hati enshuro y'amaizi g'amagara niki? N'eiziba eritarikwoma.

"Eiziba eritarikwoma, eryo niriiha, Ow'eishe-emwe Branham?"

N'eiziba eriguma obutoosha nirireeta amaizi kuruga ahansi omu itaka reero rikatsindika amaizi gaaryo ahaiguru. Nigahimintika obwire bwona. Niryeveisaho. Obutoosha ni marungi kandi n'amayonjo, eiziba eritarikwoma, enshuro y'amaizi g'amagara. Tirifiire kandi tiriterami. Riine amagara, niriguma nrihinduka obwire bwona, nirireeta ekintu kisya obutoosha, nirigumizamu, niriruga omu burugo bwaryo. Niriiha amaizi gaaryo hare omu-omu itaka, ekiri . . . nabwo rikiri enshuro y'amaizi g'amagara nigeeshukyeera ahaiguru. Nigeeshemeza go gonka; n'amayonjo, gashemeire, amaizi amayonjo. Niryeveisaho; torikwetenga kutegyereza enjura okurijuza. Obutoosha niriborogota, nirigabira busha amaizi gaaryo. Tikirikwetaagisa okuripika, okuritooza oku n'oku, okurimyora, nari okuryegaitaho. N'enshuro y'amaizi g'amagara kwonka.

42 Noomanya, kwata ebiziba ebikuzire ebi ebya ira, nooteekwa kukyetooroza kandi okyetooroze kandi okyetooroze, kandi okipikye na buri kimwe, kugira ngu oihemu otwizi tukye tw'ago maizi agaterami. Aha!

Kwonka Enshuro y'Amaizi g'amagara Neegareetera, busha, hatariho kupika, kwegaita, n'ekindi kyona. Oo, nshemerere ahabw'egyo Nshuro! Eego, sebo!

Terikwetenga kukozesa akagyegyena Ahariyo, kwihamu obukooko. Ahakuba, nigarugira kimwe ahansi hare, okwo omu Rukiri, okuhitsya obu hatariyo n'obukooko.

Tikirikwetaagisa kugira akenda k'obwegyese Kugireereetaho, ekkyo kihikire, entwaza nanka ei ensi yaataireho ekozirwe abantu n'obwengye bw'ebigombe by'amadiini; kukugambira, omu maisho g'omushaho w'endwara z'ebiteekateeko, yaaba orikubaasa kubuurira nari otarikubaasa. Egyo nshuro teine n'obu kaakuba kamwe ahari otwo twenda otugubire Kugireereetaho. Ekaakanaga hare munonga ahonaaho waakataho aho. Torikubaasa kukikora. Eiziba eryo niriborogota, obwire bwona. Ku waakuritaho kamwe aha twenda otwo, rikaakanagira kimwe hare orubaju rumwe nari orundi. Eiziba eryo tiriiniire bwire akenda k'ekigombe ky'ediini ahariylo.

43 Tirikwetenga akagyegyeneso koona, nari akagyegyena koona, nari kupika kwona, nari okutetema kwona, nari ekindi kintu kyona. Eiziba eryo riryaho kwonka, niriborogota. Tirikwetenga obuhwezi bw'enjura y'ekicweka ekkyo kugwa ekarijuza. Enjura nikwo "okusisiimuka," ahu egyo Nshuro . . . Aho n'ahari egyo Nshuro y'Amagara. "Ahu omutumbi guri, niho empungu ziteeranira." Torikwetaagisibwa kugyema okusisiimuka; torikwetaagisibwa kugyema ekintu kyona. Ekintu kyonka ekky'orikwetaagisibwa kukora n'okwija ahari egyo Nshuro kwonka. Burijio etuura ejewire amaizi marungi, agaboneire, kandi Teine muheru. Neegumizamu neeborogota.

Torikwetaagisibwa kuza aha kiziba, reero okagira oti, "Mbwenu, ku eraagwe haza ekatemba aha mutwe gw'enju y'amatungo nituza kutunga eky'okunywa." Mwareeba? Mugyenzi, mugyenzi! T'egi. Eiziba eryo eritarikwoma nirihi mintika nirireeta amaizi marungi, agarikufuka obwire bwona. Noobaasa kuryesiga. Torikwetaagisibwa kugira oti, "Mbwenu, ninza kuza aha kiziba eki ekyira. Tukaba tunywaho amaizi, kwonka enjura yaamara obwire bwingi etagwire. Ninkugambira, nikibaasa kuba kyomire."

44 Ogwo nigwo muringo ogu zimwe aha ntwaza ezi ezigunzirwe abantu zirimu. Noobaasa kutaahamu, waaba oine ekintu ky'amaani ekirikugyenda omu maisho, ekibiina kihango ky'abeeecwireho ky'okuguza ekintu nanka, nari-nari ekintu nanka ekirikugyenda omu maisho, amagyenyi g'amaani n'ebindi ebirikugyenda omu maisho, emizaano ya waakareeba, n'amagyenyi omu kishengye ky'ahansi y'eitaka, na buri kintu, noobaasa kushanga enju ejiwire.

Kwonka waaza ahu egoy Nshuro etuura neeborogota, obutoosha, abantu bariyo nibeetungira eky'okunywa kirungi, ky'amaizi agarikufuka. Noobaasa Kugyesiga! Oti, "Bamazire emyaka ikumi bataine okusisiimuka." Ku oraabe noobaisibwaho egoy Nshuro, Etuura eine okusisiimuka okurikugyenda omu maisho.

45 Nk'omushaija mukye omunya Wales oku yaagambire. Nimmanyisa, rimwe obu baabaire baine okusiisimuka kw'abantu ba Wales nikugyenda omu maisho, hariho ab'ekitiinisa abaarugire omuri Amerika. Bamwe omuri aba Baadokita omu by'Ediini bakuru bakaza okwo omuri Wales, kumanya ni nkahi kandi n'eki ebi byona byabaire biri. N'ahabw'ekyo bakaba bajwaire engoro zaabo, n'enkofiira zaabo, kandi bakaba nibatambura nibashuma omu nguuto y'omu rurembo.

Reero ngugu hanu yaija omuporiisi mukye, naayetoorooza batuuni ye nkye eya ira omu ngaro ze, naacuriza, "Aha musharaba ahu Omujuni wanye yaafeereire, ahansi aho niho naatakiire ngu nshemezibweho ebibi; niho Eshagama yaateereirwe omutima gwangye, Eiziina Rye riheebwe ekitiinisa," naatambura naashuma omu nguuto y'omu rurembo.

N'ahabw'ekyo baagira bati, "Ogu naareebeka kuba omushaija omunyadiini. Tuze kumubuuza."

Reero baagira bati, "Sebo!"

Ati, "Eego, sebo?"

Yaagira ati, "Nituruga omuri Amerika. Turi entumwa. Twaija hanu kucondooza okusiisimuka kw'abantu ba Wales, nk'oku kurikwetwa. Turi Baadokita omu by'ediini, mbwenu twaija kukucondooza." Yaagira ati, "Nitwenda kumanya ahu okusiisimuka oku kuri, kandi n'ahu kuhamiire."

Omuporiisi yaagira ati, "Sebo, mwakuhikireho. Niinye kusiisimuka kw'abantu ba Wales." Amiina! "Okusiisimuka kw'abantu ba Wales kuri omuriinye. Hanu niho kuri."

46 Okwo nikwo kiri waabaisibwaho n'egoy Nshuro y'Amaizi g'amagara. Neesheneneba obwire bwona, neeborogota kandi eborogota, kandi eborogota kandi eborogota. Teine bugarukiro bwona. Tari, "Za kureeba yaaba hariho amaizi, yaaba hanu tutungireho enjura enshumi nkye ehangwire," tikyo ekyo. N'egoy Nshuro y'Amaizi g'amagara. Nk'oku ngamba, Amaizi Gaayo Neegaheera busha.

Torikwetaagisibwa Kugitaho otwenda, kureeba; otwenda tw'ebi'obwegyese, otakamwohereize kbuurira aheeru, kugira ngu orebe yaaba naabaasa kugaiturura gye ebigambo bye, akabigamba gye, yaaba naakoresa amaziina n'entsigwa bye, n'ebindi nk'ebyo, n'enyongyezi. Baingi omuribo tibarikumanya n'eki biri, kwonka atwire aha Nshuro nikyo kimwe, mwareeba, nikyo kimwe.

47 Terikwetaagisibwa kubaisibwaho enjura y'obutoosha, kugwa ekagijuza, nari okusisiimuka kw'omu kicweka ekyo, ahabwayo. Terikwetaagisibwa kukora ekyo, ahakuba Amaani gaayo n'okushemera kwayo bigirimu. Aho niho Ekigambo kiri, Amaani Gaakyo Kyonka! Omuntu yaabaasa Kukyakiira omu mutima gwe, Kiine okushemera Kwakyo; Kiine amaani Gaakyo. Gari omu Kigambo Kyo kyonka, nigahimintika nigareeta Amagara.

Israeli ku yaabaire eruga ahari egoy Nshuro, bakaba bagwa omu kabi. Buri kaire ku baabaire Bagirugaho, bakaba bagwa omu kabi.

Naitwe nikyo kimwe hati. Okusiisimuka kwaruga ahari Ekyo, obwo nikubura omugasho. Nikwetimbira amaziba, kandi, nimmanyisa ebiziba by'ebiyagaana, reero kuhwaho.

48 Kwonka burijo Akaba abahwera. Okwetomboita aha Nyanja Erikutukura, reero ku baayetomboitsire . . . Kwonka nabwo, omuri ebyo byona, Akaba araganiise, abaraganiise. Akaabaire yaabagaruriireyo aho honyini, omuringo ogu twakukireebamu; kwonka Akaba yaaragaanise kubahitsyayo.

Akakora ki? Abo baana ba Israeli, Akabaha Enyomyo y'Omuriro na buri kintu, eby'okuhamya, nabi waabo. Kandi byabebembera kurugayo kuhika aha Nyanja empango. Kandi, burijo, hariho akabi k'Okugirwanisa. Kandi ngugu hanu Faraho yaija n'eihie rye. Beitu nimumanya eki Ruhanga yaakozire? Akabaganisamu habiri ekyo kiziba ekirikutukura, ky'ebiyagaana.

Enyanja y'Omwonyo nikyo kintu ekirikukirayo kuba ekifiire omu nsi. Buzima efiire. Eterami. Tihariho ekintu

kyona ekirikubaasa kugituuramu.

Kandi Akagibaganisamu habiri kandi yaabakomoorora, aha rubaju ruriya. Yaabatwara ahu baabaire batakibaasa kukomwa n'ekintu nk'ekyo.

49 Omu ihamba, bakashanga ngu zaatanka zikaba zitarikubaasa kwesigwa; zikaba zoomire. Bakashanga ngu, nibaruga aha kiina ky'amaizi kimwe baza aha kindi. Obu baabaire bari omu ihamba, bakaba bakuuhwire enjara erikwenda kubaita, ahabw'okubura amaizi g'okunywa. Kandi bakaba baza aha tanka egi hanu, ekidiba; bashanga kyomire. Baza omu mwanya ogundi; bashanga kyomire. Bakaba batarikubaasa kuteekateeka ngu nibaza kutunga eky'okunywa.

Reero omu mwanya ogurukukirayo kubanganisibwaho omu ihamba ry'omusheenyi ryona, niho baashangire amaizi. Gakaba gari omu rukiri. Gakaba gari omu rukiri. Omwanya ogurukukirayo kubanganisibwaho ogu omuntu yaakushangamu amaizi, n'omu rukiri orwomire ahagati y'eihamba ry'omusheenyi. Kwonka, nimureeba, Ruhanga nikwo akora atyo ebintu. Omu mwanya ogurukukirayo kubanganisibwaho, omu muringo ogurukukirayo okutaba ogwa burijo. Ekyo burijo nikyo tutuura twine.

50 Nibateekateeka ngu nooteekwa kugira abantu b'amaani b'ekigombe ky'ediini, kuba hamwe, reero obarekye boona beeteerane hamwe reero bagireho okuyogoorekana kwangi kw'amaani aho, n'ebindi nk'ebyo, reero batungye abantu enkumi n'enkumi b'okukwatanisa nabo, kandi byona nka bati, kutunga okusisiimuka.

Obumwe n'obumwe Ruhanga akwata omuntu mukye okuzire otarikumanya nangwa na za ABC ze, kandi rwagati honyini y'ekibiina ky'abantu abateeegire haihi abatarikumanya kutaanisa omukono gwabo gwa buryo n'ogwa bumoshio, Naabaasa kutandikaho okusisiimuka okurajje kutengyetsa ensi. Akakikora omu bwire bwa Yohaana. Yaakikora omu bwire bwa baanabi. Tihariho n'omwe omuribo, nk'oku turikumanya, owaabaire areegireho, kwonka Ruhanga akaba naabaasa kubakwata kandi agira eki yaabakozesa.

51 Omu Rukiri oru hakarugamu amaizi. Akaba ari orwo Rukiri. Kandi Akaragiira Orukiri oru, kandi Rukaba niruteekwa kuteerwa. Kandi Yaaha amaizi maingi agashemeire, marungi, amayonjo buri mutu owaabaire naayenda kunywa. Akajuna boona abaabaire Nibarunywaho. Ekirkushusha na Yohaana 3:16 ekihikire.

... Oku nikwo Ruhanga yaakunzire atyo ensi, akahayo Omwana we omwe nyamunegyere, ... omuntu weena orikumwikiriza arekye kuhwerekyerera, kureka atungye amagara gatahwaho,

Ruhanga akateera orwo Rukiri, ahari Gologosa. Yaagiibwaho orubanja rwaitu, kugira ngu Omuriwe habaase kurugamu Omwoyo w'Amagara owaabaire naaza kuha nyowe naiwe Amagara Agatahwaho. Egyo n'enfumu ekihikire y'Orukiri, okwo omu ihamba eri.

52 Kikaba kitarikubeetaagisa kukurura, kutimba, kupika, nari ekintu kyona; kureka okwejumba omu muhanda Gwe ogu ataireho kwonka, ahabwa busha. Obwo, kikaba kitarikubeetaagisa kugakurura kugaiha omu kidiba. Kikaba kitarikubeetaagisa kugatahisamu baketi. Kikaba kitarikubeetaagisa kukoma baketi aha mugoye kugaihayo. Bakaba bashemereire kuganywa kwonka.

Kandi nikyo ekyo kyonka ekirihohati. Torikwetaagisibwa kwegaita aha kintu kyona. Torikwetaagisibwa kuteeza amaju ahari rutaari reero okahangahanga ekintu, nookipika. Torikwetaagisibwa kugamba ekigambo okakigarukamu, kandi okakigarugamu, kandi okakigarukamu, okuhitsya obu oraatungye orurimi orushobire. Ekintu kyonka eki oshemereire kukora n'Okumunywaho, ahabwa busha, omuhanda ogu Ruhanga ataireho. Ti kupika, ti kutsindika, ti kintu kyona; iwe fa Kurunywaho, ahabwa busha. Tihariho eki oshemereire kukora; iwe fa Kurunywaho. Nimmanyisa ngu, oikirize Orukiri kwonka. Nikyo kyonka eki ndikubaasa kukigambaho.

Kikaba kitarikubeetaagisa kukora ekintu kyona kugira ngu barutungye. Kikaba kitarikubeetaagisa kutimba kugira ngu barutungye. Kikaba kitarikubeetaagisa kushutama ahansi haza bakarira ekiro kyona, kugira ngu barutungye. Bakarunywaho kwonka; rukaba ruteirwe kandi rweteekateekire. Nikwo kiri.

53 Nindanza omushaija hati, oshutami enyima omu kishengye hanu. Niinyijuka ndikumugambira ekyo, aha nju yamatungo ekuzire ekiro kimwe, haihi n'eryato ery'ente ziriiramu.

Reero yaagira ati, "Kwonka tindi murungi."

Naamugira nti, "Nimmanyisa ngu tori murungi." Kandi naagira nti, "Naanye, tindi murungi." Kwonka naagira nti, "Nooreeba eki ori. Kwonka reka kureeba eki ori, kureka oreeba eki Ari."

Yaagira ati, "Kuri nimbaasa kuruga ahari zaasigara ezi, Ow'eishe-emwe Branham, nka-nka-nkaaba Omukristaayo."

Naagira nti, "Otazirugaho. Noogyezaho kuba murungi nikwo obaase kwija ah'Ari. Taraizire kujuna abantu barungi; akaija kujuna abantu babi abarikumanya ngu ni babi."

Yaagira ati, "Mbwenu . . ."

Naagira nti, "Hurikiza, torikwenda kuza gehena, nooyenda?"

Yaagira ati, "Ngaaha."

Naagira nti, "Mbwenu, tikirikukwetaagisa kuzayo. Akafa kugira ngu otazayo."

Yaagira ati, "Eki nshemereire kukora niki?"

Naagira nti, "Tikiriho. Nikwo kyanguhi kityo."

Yaagira ati, "Kuri nimbaasa ku . . ."

Naagira nti, "Waatandika, kugamba ahari egoy sigara ogundi murundi. Reka kuteekateeka ahari egoy sigara. Ijuka, Muteekateekyeho, eki Yaakozire, eki Ari; atari eki ori. Tori murungi; kandi tokabahoga murungi, kandi toriba murungi na kakye. Kwonka, eki Ari, Niwe Ogwo!" Kandi naagira nti, "Hati, ekintu kimwe kyonka eki orikuteekwa kukora; ku Araabe yaagiire omu mwanya gwawe eifo okwo, iwe yaakiira oyekundiire eki Yaakozire. Ekintu kyonka eki orikuteekwa kukora n'okukyakiira."

"Waamanya," yaagira ati, "ekyo kyanguhi. Ekyo naaza kukikora."

54 Naagira nti, "Ngugu hanu omugyera." Mwareeba? Nkamureeta hanu kandi naamubatiza omu Iziina rya Yesu Kristo.

Bamwe aha bantu be bashutami hanu, kandi ni-nimmanya ngu bakeehuriram u okutari kwa burijio nyowe ku naakozire ekyo, kwonka nkaba nimmanya eki naabaire ninkora. Nkareeba omu mushaija ogwo ekintu ekyabaire kiri eky'amazima. Nkaba nimbaasa kukireeba aho, kandi nkamutwara naamubatiza omu Iziina rya Mukama Yesu.

Kandi, ku twakozire ekyo, tikiratwaire mwanya muraingwa ahanyima y'ekyo okuhitsya obu naashuumire eifo omu nju y'omutabani we. Tukareeba o-okworekwa kw'omuti niguhendwa omu mwanya nanka, kandi omushaija ogwo yaagwa, kakye ahendekeye omugongo. Bamutwara omu irwariro. Kandi ekiro ekyo Mukama, yaanshuuruurira ngu, ogwo nigwo omuheru gwa sigara.

N'ahabw'ekyo ekiro ekyakuratsireho akaba naayenda zaasigara. Naagira nti, "Naaza kumugurira pakiti ya sigara haza ngimutwarire. Iwe orebe kandi oyetegyereze, ebiro bye bya sigara bihweire." Takareetsaga n'emwe okwiha obwo, kandi takeetengaga n'emwe okwiha obwo. Ruhanga!

Mwareeba, ekintu ky'okubanza eki orikuteekwa kukora n'okwija ahari egoy Nshuro. Nooteekwa kwija ahari ago Maizi, omanye ngu ti kintu eki orikubaasa kukora. N'eki Yaakukoreire. Tikirikukwetaagisa kutimba; tikirikukwetaagisa kupika kugaihayo; tikirikukwetaagisa kureka eki; tikirikukwetaagisa kureka kiri. Ekintu kyonka eki orikwetaagisibwa kukora n'okuhikayo haza okanya. Nikyo ekyo kyonka. Ku oraabe oine eiriho; nywa!

55 Hati, Akaba ari Orukiri. Ruhanga Akamuteera ahabwaitu, reero Yaareeta amaizi maangi marungi, agashemeire. Na hati Naakikikora, eriizooba, ahari buri omwe oraikirize. Ezi n'embabazi Ze, hatariho kubangaanisa, aha bantu Be, itwe.

Hakaba hariyo ekintu ekirkushusha, nk'abantu b'eriizooba, abeeteekateekire kwakiira eki barikubaasa kutunga, kwonka kandi batarikwenda kuheereza ahabw'eki baayakiira. Israeli ekaba eyeteekateekire ku-kunywa aha rukiri hati, kwonka bakaba batarikwenda kuheereza Ruhanga ekyabaire Kimushemereire.

Kandi obutoosha Atuheereza. Nimumanya, titurikubaasa nangwa n'okwitsya Atariho. Obuheereza bwa Ruhanga bwaba butariho titurikubaasa kwitsya. Okwo nikwo turiho Ahabwe. Kwonka, kandi, haihi kyenda kutucwamu ebicweka biri ku tugyezaho kukora, kugira eki Twamukorera. Yaatugambira kugira eki twakora, kugyenda kureeba omuntu, kugyenda kushabira omuntu, kugyenda kuhwera omuntu, haihi kyenda kutwita, okukikora. Kandi titurikwenda Kumukorera ekintu kyona nk'omurimo.

56 Okwetombaita Kwe kukaba kuri ngu, "Baanyimwire, nyowe Ekigambo; kandi baayakiira ekiziba ekifumukire, omu mwanya Gwangye. Okwakiira . . . Baanyimwire, Enshuro y'Amagara, Enshuro y'Amaizi g'Amagara; kandi nibetenga ngu haakiri banywe aha kiziba ky'ebyagaana." Ekyo noobaasa kukiteekateeka?

Noobaasa kuteekateeka omuntu hati, ngu, hanu hariho eiziba ery'enshuro eririkureeta ago maizi marungi, g'omu ibaare rya laimu, nigaruga hare omu nkiri, ahansi okwo mu myariro y'omusheenyi, n'ebindi nk'ebyo, nigaruga kandi marungi nk'oku kirikubaasika; haza ngu haakiri banywe agarikuruga omu kiziba kuri, agarugire eruguru y'enju yamatungo, n'ebihongore, hamwe n'ebiyombeko by'aheeru ebyetooroire omwanya ogwo? Kandi gaze omuri ekyo kiziba okwo, ahu amaizi agarikutoonyooka nigaruga aha nju yamatungo, ebiju by'embaraasi n'ebi'ente, gagaruka gakakizamu, kandi na buri kintu nikigaruka kiza omu kiziba, reero nitwenda ku . . . banywe agarikuruga omuri ekyo batakagiire aha iziba eryo eritarikwoma? Nihaba hariho ekintu ekishobire omu bwonko by'ogwo muntu. Ekyo kihikire.

57 Kandi omushaija nari omukazi yaihamu ekigombe ky'ediini nk'omusingye gwabo, ekirikwikiriza eishokye erishazire, kujwara ebijwaro bigufu munonga, kwesiiga erangi, ebintu ebi byona eby'endijo miringo, hamwe n'ebintu bikye ebiri nka-nka puroguraamu, n'ebi byona eby'okutwaza kubi, kandi bakabaasa kuza omu bwekuubo omu bazaanira emizaano y'obupiira, kandi-kandi n'obushema obwo bwona ebiso okwo, haza ebyo bakabaasa

kubigumisiriza; haza ebyo bakabikunda okukira oku barikukunda Ekigambo kya Ruhanga eky'omutindo ogwa ira ekirikutemagura kandi kikahigura, kandi kikahindura abakazi bakaba abakyara, kandi kikakwata kandi kikatuma bajwara kurungi kandi baatwaza kurungi, kikakwata sigara n'etaabe, n'okurahira n'okukyeena, kandi n'okubeiha n'okwiba, kikabikwihamu, kandi kikakwihamu n'esi yoona, kandi kikakuha Ekintu ekirikuhaazya buzima. Ahabw'enki omushaija nari omukazi arikuza aha kintu nk'ekyo kugira ngu kimuhuumurize? Noobaasa ota kutunga okuhuumurizibwa kuruga omuri ekyo?

58 Noobaasa ota kutunga amaizi marungi kuruga omu kiziba ky'ebiagaana? Ahabw'enki omuntu na . . . omuntu ku yaakuza aha kiziba ky'ebiagaana kutunga eky'okunywa, kunu hariho eiziba ryenshuro erigwire, noobaasa kugira oti, "Omu biteekateeko by'ogwo muntu harimu ekishobire."

Kandi omukazi nari omushaija ku arikuza omu mwanya nk'ogwo kusherura obuhuumure, nihaba hariho ekintu ekishobire omu by'omwoyo by'omuntu ogwo. Tibarikwenda Ekigambo. Nikyoreka ngu obuhangwa bwabo bukiri ekikyere, nari akaana k'ekikyere, nari ekindi kintu, ekyo kihikire, ekintu ky'obuhangwa obwo oburukukunda ekyo kidiba ky'ebiagaana, ahabw'okuba ebintu nk'ebyo tibikaatuura omu kidiba ky'Amaizi marungi. Tibirikubaasa kukikora; n'Amaizi marungi. Tibirikubaasa kukikora.

59 Hati, okwetomboita kukaba kuri ngu, "Bakagitsigaho." Kandi ebiro ebi bakozire ekintu nikyo kimwe.

Hati reeba omukazi aha iziba. Mbwenu, akaija aha kiziba kya Yakobo, kandi akaba atwire naatahayo amaizi obwire bwona, aha kiziba kya Yakobo. Kwonka ekiziba kya Yakobo, ekigombe ky'ediini, oku twakukyeta, 'habw'okuba akatimba bishatu; kandi n'eki niwe yaabaire akitimbire. Hati, ogwo mukazi akaba aine ekitebyo kikuru. Akagira ati, "Hati, tata akatimba eiziba eri, Yakobo. Akarinywaho, kandi n'ente ze zaarinywaho, na buri kintu. Ekyo ti kirungi munonga?"

Yaagira ati, "Kwonka amaizi agu orikutahayo, noogaruka ogira eiriho, kikwetaagisa kugaruka hanu kugataha. Kwonka," yaagira ati, "Amaizi agu Ndikukuha n'Eshuro, Enshuro erikureeta amaizi kuruga omunda, kandi torikwija hanu Kugataha. Eri naiwe."

60 Yetegyereze. Kwonka ogwo mukazi ku yaamanyire ngu Enshuro y'Ebyahandiikirwe yaagamba nawe, kurabira omu kamanyiso k'Ebyahandiikirwe aku yaabaire atwire naasherura, akatsigaho egoy nkora y'ekigombe ky'ediini kya Yakobo kandi tarakigarukiremu ogundi murundi, ahabw'okuba akaba aboine Orukiri rw'amazima. Mwareeba? Akairuka yaataaha omu rurembo. Eby'ekibi akaba abiherize. Akaba atakiri mukazi w'emicwe mibi. Akagira ati, "Mwije, mureebe Ou naabona, Omushaija Owangambira ebintu ebi naakozire. Ogu tiwe Kristo wenyini?" Omukazi . . . Ekyo kiziba nikibaasa kuba kyabaire kiri kirungi; kikaba kihikiriize ekigyendererwa kyakyo. Hati akaba ari aha Nshuro y'amazima. Ekiziba kikaba kiri kirungi okuhitsya obu Enshuro y'amazima yaiguka. Kwonka Enshuro y'amazima ku yaizire, ekiziba kyahwa amaani. Omukazi ogwo akamanya ngu hariho omwanya murungi okukiraho gw'okunywaho.

61 Kandi hariho omwanya murungi okukiraho. Hariho omwanya murungi okukiraho, kandi ogwo guri omuri Kristo. Omuri Yohaana Orikwera 7:37 na 38, Yesu akagamba, aha muheru gw'obugyeniyi bw'ensiisira ati, "Omuntu weena ku araagire eiriho, aije Ahariinye, anywe."

Boona bakaba bashemereirwe. Bakaba baine amaizi makye agarikuruga ahansi y'eitambiro, kandi-kandi aho boona niho baabaire nibanywa, omu kujaguza, kw'o-obugyeniyi. Reero baagira bat, "Baatatenkuriitwe bakanywa aha rukiri rw'omwoyo omu ihamba." Mwareeba, bakaba beetimbiire ekiziba, amaizi agaterami agu baabaire bapika kuruga ahansi ahantu nanka, reero gakeeshuka omuri hekalu aho. Kandi boona bakaba bateeranira aha maizi aga reero banya, reero bagira bat, "Emyaka mingi ehingwire, baatatenkuriitwe bakaganywa omu ihamba."

Yesu akagira ati, "Niinye orwo Rukiri orwabaire ruri omu ihamba."

Baagira bat, "Tukarya Emaanu eyaarugire omu Igru, kandi Ruhanga

Akagitugwisiza."

Yaagira ati, "Niinye egoy Maanu." We, egoy Nshuro, akaba ayemereire rwagati yaabo. Ogwo Mugaati gw'Amagara gukaba gwemereire rwagati yaabo.

Kwonka nabwo bakaba Batarikugwenda. Haakiri bagire ekiziba kyabo; ahabw'okuba, omuntu akaba akozire eki, kwonka Ruhanga akaba ayohereize Ekyo. Buzima egoy niyo ntaaniso. Bakeetimbira ebiziba!

Akagira ati, "Omunu weena, ku araagire eiriho, aije Ahariinye, anywe." Niwe egoy Nshuro.

Kandi nk'oku Ebyahandiikirwe bigamba, "Emigyera y'Amaizi g'amagara eryahimintika omunda ye." Oo, Niwe eiziba eryo eritarikwoma! "Okuruga omunda ye, nari hare munonga omunda ye, emigyera y'Amaizi g'amagara eryahimintika."

62 Niwe orwo Rukiri orwabaire ruri omu . . . Orwo rukaba ruri Orukiri rwa Hagari, omu bwire bw'akabi; obu omwana we yaabaire ari haihi kufa, obu yaabaire abingirwe omu rusiisira, kandi ari aheeru okwo n'omwana we

Ishimaeli. Amaizi ge, omu kiziba kye agu yaabaire atwaire, gakaba gaahweire. Reero yaarambi Ishimaeli omwana we ahansi; kandi yaagyenda, hangahari, kandi yaarira, reero, oo, ahaw'okuba akaba atarikwenda kureeba omwana we naafa. Reero ahonaaho, Maraika wa Mukama yaagamba, kandi yaashanga Beeri- . . . Beeri-sheba, e-eiziba aho eryabaire nirihihimintika, kandi nirikihimintika n'okuhitsya hati. Akaba ari Beeri-Beeri-sheba wa Hagari, Orukiri ebiso okwo omu ihamba.

63 Akaba ayemereire hanu omu Nshuro ejewire Eshagama, ekiro ekyo, ayemereire aho omuri hekalu. [Omwanya oguriho busha aha rutambi rw'amaraka -Omur.] . . . obwire bw'eihunga. Omuri Zakaria eshuura ya 13, Niwe yaabaire ari egyo Nshuro eigwire omu nju ya Daudi, ahaw'okushemeza, kandi (ekibi) ahaw'okushemezaho ekibi. Niwe yaabaire ari egyo Nshuro. Kandi omuri Zaaburi 36:9, Niwe yaabaire ari Enshuro y'Amagara ga Daudi. Akiri egyo Nshuro y'amaizi omu nju ya Daudi.

Kandi n'Ow'omuhimbi w'ebiyeshongoro, okwo omu mutima gwe. Omuhimbi w'ebiyeshongoro akagira ati:

Hariho Enshuro ejewire Eshagama,

Erikuruga omu mitsi ya Emanueli,

Abasiisi ku beejabika omu mwegyemure ogwo,

Baihwaho ebibi byabo byona.

Niwe egyo Nshuro y'Amagara, Enshuro y'Amaizi. Niwe Kigambo kya Ruhanga.

64 Abantu b'ebiro ebi by'aha muheru Bamwimwire, Ekigambo ky'amazima, Amaizi g'Amagara; reero baayetimbira ebiziba by'ebigombe by'amadiini; kandi, baagaruka, baatimba, baarima!

Kandi hati nitumanya ngu, batwire baine ebiziba ebifumukire. Reero ekiziba eki kijjwire obukooko oburikureeta endwara bw'obutaikiriza, n'okwehimbisa kw'obutaikiriza, zaapuroguraamu z'obwegyese, n'ebindi nk'ebyo, ebihindukire aha kuraganisa kwa Ruhanga. N'abarikubanganisa Ekigambo.

65 Hati, ebiziba ebi baine, Baiburi neegira ngu, bikaba "bifumukire." Ekiziba ekifumukire n'ekiziba "ekirikutoonya," kandi nikitoonyooka. Nikikora ki? Nigatoonyookyera omu kidiba ky'eiteeraniro rya kazambi ky'ediini ekirikwetwa Orukiiko rw'Amakanisa g'Ensi. Kandi omwo nimwo ekiziba ekifumukire kirikubeebembera nikibatwara, ebyo byona ahaw'okuba Bamwimwire, kandi ba . . . Enshuro y'Amaizi g'amagara; kandi baakora ebiziba ebi.

Nibatimba enkora z'okwega zaaseminariyo z'amaani, obwegyese, n'ebindi nk'ebyo. Ebyo nibyo biziba ebi barikutimba ebiro ebi, ngu omuntu naateekwa kugira diguri ya Ph.D., nari LL.D., nari diguri ya Bachelor of Art, nari ekindi kintu, atakagiire nangwa n'okubuurira. Ebiziba ebijjwiremu enyegyesa z'ebi'ediini ezigunzirwe abantu. Nibabatwara omuri aga mashomero g'obwegyese mahango g'amaani, reero omwo babataasyamu enyegyesa zaabo z'ebi'ediini ezigunzirwe abantu, reero babatum baine ebyo. Ka n'obwire obu tutwiremu, ebiziba ebikozirwe abantu! Tihariho kabi e . . . Tiky'okutangaaza ekintu ekyo kihindukire e-ekinuuko, oo, mugyenzi, n'ahaw'okuba ngu abantu nibyo barikunywaho.

66 Kandi abantu baaba nibenda okushemererwa ebiro ebi, nibakora ki? Abantu, omu mwanya gw'okwakiira okushemererwa kwa Mukama, nibahindukira ekibi, omu kusherura amashemererwa. Abantu abaza aha kanisa kandi bakeeyeta abaheereza ba Kristo, ku battina munonga bacumika sigara. Kandi ku bari-ku barikwenda ku-kugira eby'okweschemeza, bajwara ebijwaro by'obwamaraaya ebibakwatsire aha mubiri reero baza aheeru reero bashuusha obunyaantsi obwo abashaija nibarabaho, kugira ngu babateerere akacurizo. Nibakora byona kugira ngu bakundwe abantu baingi. Nibenda ngu bashushane nk'abazaani ba sineema. Okwo nikwo kushemererwa kwabo.

Obwo, Yesu yaagizire ati, "Niinye kumarwa kwabo."

Enshonga erikutuma baaza omuri ebyo, n'ahaw'okuba tibarikwenda kunywa ahari egyo Nshuro. Bagyangire. Tibarikwenda Kuginywaho. Nibeegaita aha nkora z'abantu, ekiziba nanka ekiijjwiremu ebintu byona ebishangwa omu byagaana, kugira ngu baabaase kugyenda batyo.

67 Nyomwebazyo, tubaire twine abaana eruguru aha mugyera. Niinyikiriza ngu rubaire ruri Orwamukaaga akasheeshe. Tushuumire eifo; Billy abaire naashoha ari omu bwato. Reero twatwara abaana eruguru, mwijukuru wangye omuto w'omwojo hamwe nabo, muhara wangye, na mutabani wangye omuto, reero twaza eruguru aha mugyera ku-kuvuga eryato. Obaire otarikubaasa nangwa n'okuvuga eryato aha mugyera, ahaw'oburofa, okusiisikara, abantu babi bari aho aha mugyera, bari nk'abajwaire busha kandi nibatwaza kubi. Eryato rikaija ryahika aha rubaju rwaitu, ekibiina ky'aboojo bato b'emyaka ikumi-na-eibir-, ikumi na ina y'obukuru, buri omwe aine emikyebe y'amaarwa omu ngaro ze, na sigara. Ekyo nibakyeta "okweschemeza." Oo, mugyenzi! Ensi egi neeza kuhitsya ryari, n'enkora nk'egyo?

68 N'ahaw'ekyo okweiyhamu ebiteekateeko by'okugira ngu ku barifa baryaza gehena, ekintu eki bakora, nibagyenda kandi beegaita ahari kimwe ahari ebi biziba ebikozirwe abantu. N'ahaw'ekyo abantu b'ekika ekyo

nibashangwa omuri ekoy kiziba. Ti kindi kureka n'ekibiina ky'ensi ky'emishundwe etasHEMEIRE, ekirofahaire. Kandi nibakwatanisa nakyo ahabw'okuba, nk'oku omukaikuru wangye yaabaire agamba ati, "Enyonyi z'amoooya agarikushushana ziguruka kumwe." Tibakaija aha Nshuro ngu bashemezibweho ago magara g'ekibi. Nibenda kutuura aheeru okwo, kandi nabwo bagumye obujurizi ngu n'Abakristaayo. Ahabw'enki? Bakamuteera amabega, Enshuro y'amazima y'okusheimererwa, Amagara, Amagara agahikiriire hamwe n'okumarwa. Egyo niyo nshonga eyaatumire baakikora, ahabw'okuba ngu nibenda kwegaitaho. Bainemu abantu okwo abarikwikiririza omu kintu ekoy.

69 Hanu enshumi nkye ehwiringire, nyowe n'Ow'eishe-emwe Fred, n'Ow'eishe-emwe Tom, twena tukaza omu kanisa rugambwa y'Ababaputisiti omu rurembo rwa Tucson, okureeba yaaba twabaire nitukubaasa kubona ekintu kikye obundi eky'okutushashaanuraho kakye. Reero omuheereza yaagira ekintu eki yaagamba aha bantu omuri Misri, obu barugayo bakaba nibarya katunguru cumu n'ebindi nk'ebyo, bakaba nibenda kugarukayo ogundi murundi reero ngu babiryre. Yaagira ati, "Ekyo kiri nk'abantu b'ebiro ebi."

Reero, naitwe, twena twagira tuti, "Amiina!" Tinkareebahoga ekibiina nka kiri! Ekanisa yoona ekareka kureeba omubuurizi reero yaahinduka yaaranzya enyima kureeba owaagamba "amiina." Kikabatiinisa kwenda kubaita. Tibaramanyire eki kyabaire kiri.

Kunu, Daudi, yaagizire ati, "Muteerere Mukama akaari k'okusheimererwa. Mumuhimbise n'enanga; Mumuhimbise n'endingiri! Byona ebiine omwitsyo bihimbise Mukama. Kandi muhimbise Mukama!" Ruhanga naashemerererwa abantu Be. K'abeegire, bagire bat, "Amiina," ekintu kyona kyagambwa gye.

70 Ahabw'enki mutarikuhinduka mukaruga omuri egi nkora n'ebiziba by'ensi, mukaza omu nkora y'amazima ya Ruhanga, niryo eiziba eritarikwoma, Yesu Kristo? Ahabw'enki Mutarikumugarukira, ahu Ruhanga ariwe kushemerererwa kwaitu okwijwire, okuhimbisa kwaitu okwijwire, okumarwa kwaitu okwijwire? Okuhuumuzibwa kw'omubiri gwangye kuruga ahari Ruhanga.

Naaba nshobeirwe, nintunga okumarwa gwangye omuri Kristo, atari mu sigara, atari mu bintu by'ensi, atari mu kwegaita aha nyikiriza; kureka omu Kumubona, Ekigambo ekiraganisiibwe eki Yaagizire ati, "Ku Ndagyende, Ndyagaruka mbaakiire." Okushemerererwa gwangye ninkushanga omuri ekoy. Niwe kushemerererwa gwangye.

71 Ebiro ebi nibagamba, ahabw'okwegaita omu bintu ebi kandi n'ahabw'okukora oru Rukiiko rw'Amakanisa g'ensi, ngu nibaza kukora omwanya ogurukiraho oburungi gw'okutuuramu. Omu kuteekateeka gwangye, nibaza kukora omwanya ogurukiraho oburungi gw'okukoreramu ekibi. Ekyo ni . . . Ekyo kyona n'ekibi, oku biri kwona; ti kutuuramu, kureka n'okufeeramu. Kutaho omwanya gwakyo gw'okukoreramu ekibi-kukoreramu ekibi, omu mwanya gw'okutuuramu.

Ekindi kintu kyona, ekiri aheeru ya Yesu Kristo n'Ekigambo Kye ky'Amagara, n'ekiziba kifumukire. Ekintu kyona ekirkugyezaho kuza omu mwanya Gwakyo; ekintu kyona eki orikugyezaho kukora kukureetera obusingye, ekintu kyona eki orikugyezaho kukora kukureetera obugwa gye, okushemerererwa okundi kwona oku orikutunga kuruga omu kindi kintu kyona, nk'eky'okuza omu mwanya gw'Eki, n'ekiziba ekifumukire ekiijwiremu oburofa. Naaha okumarwa okuhikire.

72 Niinyijuka hanu, ebyanda biri ehwiringire, nkashohorera omu muryango gw'enyima. Aheeru aho hakaba hariho omutsigazi w'omushungi owaagambire naanye, yaagira ati, "Noomanya, enshonga erikutuma buriijo waagamba aha bakazi otyo, abarikujwara ebyo bijwaro bigufu munonga hamwe n'ebindi," yaagira ati, "n'ahabw'okuba ori omugurus." Ati, "Nikyo kibeereire kityo."

Ati, "Reeba hanu. Oine emyaka engahi?"

Yaagira ati, "Makumi abiri na mushanju."

Naamugira nti, "Obu naabaire nyine emyaka mikye munonga aha yaawe egoy, nkaba nimbuurira ekintu nikyo kimwe."

Nkabona Enshuro y'okumarwa. Niwe mugabo gwangye. Amiina! Obwire bwona Yaaba nampa ekoy, obwo nibwo burungi. Ni-nikyo . . . Niwe kishushani kyangye, n'Okumureeba, kureeba omukono Gwe nigukora kandi nkareeba n'eki Arikukora. Tihariho endijo nshuro ei ndikumanya!

Oo, okwo kuhimintika kw'omuhendo
Okurikunyoza nkeera nk'orubaare;
Tihariho endijo nshuro ei ndikumanya,
Kureka Eshagama ya Yesu.
Hariho Enshuro ejiwire Eshagama,
Erikuruga omu mitsi ya Emanueli,
Abasiisi ku beejabika omu mwegyemure ogwo,
Baihwaho ebibi byabo byona.

73 Nimbagambira, tihariho endijo nshuro ei ndikumanya kureka egoy Nshuro. Ekanshemeza obu naabaire ngubire. Neengumya nshemeire, ahabw'okuba niinyenda kutuurira kimwe haihi Nay, nywe aga Maizi marungi

agarikwijuza amagara gangye n'okushemererwa.

Nimbaasa kugira enaku nyingi, kandi mpurire haihi ntarikubaasa kugyenda . . . ogundi murundi, ntarikubaasa kuza ahandi hoona; obwo nimbaasa kutsimba amaju ahansi reero nte orukumu rwangye aha kuragaanisibwa, reero ngire nti, "Mukama Ruhanga, Niiwe maani gangye. Niwe kumarwa kwangye. Niwe byona omuri byona wangye." Ntandikye kuhurira Ekintu nikiruga okwo omunda omuriinye nikiimuka. Ndugye omu naku.

74 Nk'oku mpingwize emyaka makumi ataano y'obukuru, niinyimuka omu kasheeshe, nimumanya oku kiri, torikubaasa haihi kwiha ekyo kigyeremba omu kitanda. Mugyenzi, torikubaasa haihi kukiihamu; kandi omuntu ari aha rwigi, naakongoota, nari Billy arikungambira ngu hariho ekyetengo ky'ahonaaho, ahantu ahu ndikuteekwa kuza. Reero nteekateekye nti, "Nimbaasa kukikora nta?" Ngyezaho kwiha ekigyeremba omu kitabo.

Nteekateekye nti, "Niiwe Nshuro ejewire amaani gangye. Amiina! Amaani gangye n'okuhwerwa kwangye biruga ahari Mukama. Niiwe eiziba ryangye eritarikwoma! Niiwe obutsigazi bwangye! 'Abategyereza Mukama baryagarukwamu amaani; batumbikye ahaiguru n'amapapa nk'empungu; baryairuka, tibariruha; baryagyenda, kwonka tibarigwa nshazi.' Mukama Ruhanga, obu n'obujunaanizibwa bwangye, kugyenda. Niinyetwa kuza aha murimo ogu naayeteirwe." Kandi ekintu ky'okubanza noomanya, Ekintu kitandika kwimuka omuriinye.

75 Ekiro kiri, okwo omu mwanya mukye, mbaire nyine oruteerane enyima hanu omuri Topeka, Kansas; habaire hariyo omwojo, omubuurizi muto, omwe omu bashagiki bangye b'okubanza. Ow'eishe-emwe Roy, oshutami hanu, naijuka ogwo mwanya. Omuri ogu, omuri ogu mwanya gw'amaani okwo, habaire harimu o-o . . . Ogu muheereza abaire ari omu nju nari omwanya nanka, ekisiika ky'aha rubaju kyamugwera yaahendagurika. Omuntu mukye ogwo abaire naaza kufa. Ekitigu kye kibaire kibarukire. Ekikuruma kye kiteirwe kyaruga omu mwanya gwakyo. Zaataani z'ekisiika zimugwireho.

Nkashutama ahari kyantsya, ningamba n'omukyara we. Naagira nti, "Mukyara 'we, noomanya, Yesu ku yaakubaire ari aha, noomanya eki Yaakukozire?" Naagira nti, "Obu anshagikire, 'Niinyikiriza ekyo Kigambo,' abaire naashagika Kristo." Kandi naagira nti, "Okwo n'okubeihabeisha kwa sitaane." Naagira nti, "Yesu ku yaakubaire ari hanu, Akagyenzire amutaho engaro Ze ezirkwera. Ogwo mwojo akaakizire. Tindikufayo yaaba ekitigu kye kibarukire. Akaabaire naakira, ahabw'okuba Yesu akaabaire naagyenda ataaahamu aho ahabw'okumanya Eki Yaabaire ari. Akaba naamanya okwetwa Kwe, Ebyahandiikirwe bikaba bihikire, nibyoreka Omuriwe ngu Akaba naamanya Eki Yaabaire ari, kandi hatariho a . . . hatariho okubangaanisa kwona. Akaamutaireho engaro Ze, reero agira ati, 'Mutabani, kira,' ashohora agyenda." Reero naagira nti, "Obwo, tihariho baadaimoni okuzimu abarikumara kwita omwojo ogwo." Naagira nti, "Akaabaire naakira." Kwonka naagira nti, "Nooreeba, mukundwa, Akaba ari Yesu, engaro ezirkwera za Ruhanga."

Naagira nti, "Ndy'omusiisi. Nkazaarwa okuzaarwa kw'okurabira omu kumanyana kw'omushaija n'omukazi omu by'omubonano. Tata na maawe bombi bakaba bari abasiisi, kandi naanye tindi murungi na kakye."

Reero naagira nti, "Kwonka noomanya ki? Mukama ku yaakumpa okworekwa haza akaanyohereza eifo okwo, obwo ekyo kikaaba eky'omutaano." Naagira nti, "Nkaashuumza nzayo kandi mutaho engaro zangye, akaaruga omuri ekyo kitanda ku Yaakumpa okworekwa."

76 Bwanyima naatandika kuteekateeka nti, "Kandi nabwo, ku kwakuba okworekwa, kikaaba ki? Zikaaba ziri engaro ezigubire nizo zimwe ezimuteirweho, ahaa, omuntu niwe omwe orikumushabira, engaro ezigubire nizo zimwe."

Bwanyima naatandika kuteekateeka nti, "Ndy'omujwekyerwa We. N'ahabw'ekyo, Ruhanga tiinye ou arikureeba. Egyo Shagama y'Ogwo ohikiriire eri aho ahari rutaari; nentonganirira. Niwe kumarwa kwangye. Niwe kushaba kwangye. Niwe Magara gangye." Naagira nti, "Ekintu kyonka ekyakutuma naamutaho engaro zangye, n'okwikiriza, ahabw'okuba nyine okwikiriza omu kworekwa. Kandi hatariho okworekwa, okwikiriza nikwo kumwe kukaakozire ekintu nikyo kimwe; n'ahabw'ekyo nimbaasa okuteebaramu kintu kyona, kureka Mutwaremu kuba byona omuri byona wangye. Niwe Magara gangye. Niwe Yantumire. Tihariho ekigombe ky'ediini ekyantumire; Akantuma. Haleluya! Naaza kugyenda omu Iziina Rye. Naaza kumutaho engaro." Naashuumza eifo okwo reero omwojo ogwo naamutaho engaro, kandi ekiro ekyo akaba ari omuri orwo ruteerane, akiriire kimwe. Amiina!

77 Oo, eego, Niwe egoy Nshuro. "Tihariho endijo nshuro ei ndikumanya. Teriho kureka Eshagama ya Yesu!" Ndy'omuntu otaschemeire, ndi endeme, twena nikwo turi, kwonka omu maisho ga Ruhanga tuhikiriire. Ye- . . . "N'ahabw'ekyo mube abahikiriire, nka Sho ori omu Iguru oku ahikiriire." Noobaasa kuba kwo ota? Ahabw'okuba Ogwo ohikiriire naatujwekyerayo. Egyo Nshuro eriyo buriizooba, nungi. Kitari kintu nanka ekiterami aho, kureka ni nungi buriizooba, erikunyozyaho ebibi byangye byona. Niwe egoy Nshuro.

78 Hati omu kuhendera, nimbaasa kugamba eki. Ekintu kyona ekitanuukaine n'Eki n'ekiziba ekifumukire, kandi aha muheru nikija kujwa eki waakitairesu kihwemu; ku oraabe noota amatsiko gaawe goona, obwire bwawe bwona, na buri kintu, omuri kimwe omuri ebyo biziba by'ebiyagaana. Yesu akagira ngu bikaba biri ebiziba ebifumukire. Ruhanga akagira ati, "Bifumukire, kandi biryajwa kyona eki orbitamu kihwemu." Torikubaasa kweyongyerayo nabyo, 'habw'okuba nibijja kujwa. Ahakuba Niwe muhanda gwonka ogurikuza aha Mazima, aha Magara, kandi n'aha mashemererwa Agatahwaho, hamwe n'obusingye Obutahwaho. Niwe Ogwo omwe wenka

kandi omuhanda gwonka ogurikuza ahari Ebyo. Oo, mugyenzi!

Enshuro y'Amagara etahwaho ni Yesu Kristo. Ahabw'enki? Kwonka n'Oha? Ekigambo, nikyo kimwe; Ekigambo, Amagara, Enshuro, "otahinduka, oku abaire ari nyomwabazyo n'erizooba nikwo ari, kandi nikwo ariguma ebiro byona." Aha mwikiriza w'amazima, Niwe kushemererwa kwe okurikukira byona, Amagara ge agarikukirayo obukuru. Kandi okumarwa kwe okurikukira byona kuri omuri Kristo. Tihariho kupika, tihariho kukurura, tihariho kwegaitaho, tihariho kwemererera; kureka okwikiriza kwonka hamwe n'okuhuumura. Ekyo nikyo Ari aha mwikiriza.

79 Nka tatenkuriitwe Abrahamu; tarakurwire, tareemereize mutima, tareerarikiriire. Akaba aine Ekigambo. Akabyama omu kifuba kya El Shaddai. Abrahamu ku yaahikize emyaka igana, Ruhanga akamubonekyera, kandi yaagira ati, "Ndi ow'Obushoborozi bwona." Ekigambo ky'Oruheburaayo ni El Shaddai, ekirikumanyisa, "Ogwo Oine Amabeere." "Kandi okuzire, n'amaani gaawe gahweire, kwonka byama omu kifuba Kyangye reero oyonye ogarurwemu amaani gaawe kuruga omuri egi Nshuro." Amiina! Akonka yaatunga ki? Omubiri musya. Akazaara omwana, ahari Saara. Kandi, ahanyima y'emyaka makumi ataano, yaazaara abaana mushanju aha mukazi ondijo.

Oo, El Shaddai! Endagaano eya Ira neeyoreka eki Yaakozire, Endagaano Ensyu neegamba eki Arikora. Amiina! Omu Ndagaano eya Ira . . .

80 Hati rediyo yaarugaho, n'ahabw'ekyo naaza kurahutsyahoko kandi ndugye hanu hati, omu dakiika emwe.

Niinyenda kugamba eki ntakahendeire. Nkatunga eky'okureeberaho kirungi ky'eki rimwe. Nkaba nindambura. Kandi abantu baingi hanu . . . Eifo haihi na Georgetown, eifo okwo omuri Milltown, hakaba habayo, enyima y'enshozi okwo, enshuro. Rikaba riri eiziba ery'enshuro. Rikaba rirugwamu nk'omugyera gwa-gwa fuuti ina nari itaano z'amaizi, nigahimintika nigarugayo obwire bwona, kandi n'enshuro mpango y'amaani aho. Kandi ekaba eyetooroirwe n'egi miti erikuhuumura kurungi mingi hanu, nimumanya, n'ebindi bimezire aho, nk'egyo miti erikuhuumura gye. Kandi, oo, nkaba ngira eiriho ry'okuhikayo, oo, mugyenzi, kuhika ahari egyo nshuro. Kandi nkaba mbyama aha rubaju rw'egi nshuro reero nywa kandi nywa, kandi nshutama ahansi reero nywa, ntegyereza.

Kandi buri mwaka nkaba nabwo nyija ahari egi nshuro niyo emwe. Ekaba etakoomaga, obwire bw'obutiti nari obw'ekyanda. Bukaba butarikubaasa kugifikasiiza ngu ebe nk'orubaare. Torikubaasa kufukiiriza eiziba ry'enshuro rikaba nk'orubaare. Oo, ngaaha! Oo, ngaaha! Tindikufayo n'obu-n'obu haakufuka hata, tiharikuza kufukiiriza egyo nshuro ekaba nk'orubaare. Noofukiiriza ekiziba kibe nk'orubaare; orubaare rukye ekyo nirubaasa kukikora. Mwareeba?

Kwonka ekintu kyona ekirikugyenda, ekiine Amagara omurikyo, nikigyendagyenda aho. Mbwenu torikubaasa kufukiiriza Eiziba ry'enshuro rikaba nk'orubaare. N'obu omwoyo ogwehinguririize omwanya ogwo gwakuba guri ogw'enaku okwingana ki, Eiziba eri niriguma riine amagara. Tuura aha Iziba eryo.

81 Kandi nkeetegyereza aho, nkaba mpika haihi reero nginywaho, kandi, oo, mugyenzi, amaizi marungi gonka! Kikaba kitarikukwetaagisa kwemereza omutima oti, "Niinyebuza, ku ndaahikyeyo, hoona shi nigaza kuba gaarekire kuhimintika?" Gatwire nigahimintika . . .

Omugurusi omuhingi akangambira, yaagira ati, "Shwenkuru akaganywaho." Kandi yaagira ati, "Tigakakyenderahoga nari ekintu kyona. Ekiri enshuro niyo emwe, neegyenda eyeshuka omu Mugyera gwa Blue okwo."

Naateekateeka nti, "Oo, mugyenzi, ka n'omwanya murungi gw'okurugwamu amaizi!" Nkaba ngyenda nka mahiro emwe okuruga aha muhanda, kuhika ahari ogwo mwanya, ababw'okuba gukaba guri omwanya murungi gw'okunywamu amaizi. Oo, amaizi ago ka gaabaire gari marungi! Oo, mugyenzi!

Nkaba-nkaba nzayo omuri eryo ihamba, Arizona hati, na hati ninkiriteekateekaho, "Eryo eiziba ry'okutangaaza eifo okwo, kuri nimbaasa kubyama aha rubaju rwaryo!"

Nka Daudi rimwe oku yaagambire ati, "Oo, kuri nimbaasa kugaruka nkanywa ahari eryo eiziba!" Ku yaakuhikireyo kwonka!

82 Kandi nkashutama ahansi eizooba rimwe, reero ekintu kikye ekitari kya burijo kyambaho. Reero naagira nti, "N'enki ekituma waashemererwa munonga obwire bwona? Nkabaasibwa ki nshehererwa ntyo. Noomanya, tinkakureebahoga oine enaku, okwiha obu ntandika kwija hanu. Tihariho ekintu na kimwe ky'enaku ahariiwe." Naagira nti, "Otuura oijwire amashehererwa. Nootaraaka kandi nooborogota kandi noogumizamu. Obwire bw'embeho nari obw'ekyanda, harikufuka nari harikwotsya, eki kiri kyona, otuura oijwire amashehererwa. N'enki ekituma wa . . . ? N'enki, niki? N'ahabw'okuba ninkunywaho?"

"Ngaaha."

Naagira nti, "Mpaho, obundi wakame nizikunywaho, kandi nookikunda munonga."

"Ngaaha."

Naagira nti, "Mbwenu, n'enki ekituma waaguma nooborogota munonga otyo? N'enki ekituma waashemererwa munonga? N'enki ekituma waatuura oijwire amashemererwa?" Naagira nti, "N'ahabw'okuba ngu-ngu enyonyi nizikunywaho?"

"Ngaaha."

"Habw'okuba ninkunywaho?"

"Ngaaha."

Naagira nti, "Mbwenu, n'enki ekituma wajura amashemererwa munonga?"

Kandi eiziba eryo kuri ryabaire niribaasa kungarukamu, rikaagambire eki. "Ow'eishe-emwe Branham, t'ahabw'okuba noonywaho; ekyo ninkisiima, kandi ngu ahabw'okuba nimbaasa kuha enyonyi. Nimpa weena orikwenda kunywa. Ekintu kyonka eky'orikwetaagisibwa kukora n'okwija hanu reero okanywa. Kwonka, ekituma naashemererwa, tiinye orikuborogota, n'ekintu ekiri omunda, ekirikuntsindika. N'ekintu ekirikuunyimukamu."

Kandi okwo nikwo kiri n'amagara agaijwire Omwoyo. Nk'oku Yesu yaagambire, Akaba ari omu . . . Mwareeba, Akabaha enshuro z'amaizi kufumuka omuriimwe nigareeta Amagara agatahwaho, enshuro eritarikwoma, erikureeta amaizi maingi munonga gakashandaara gakaguma nigahimintika obutoosha. Yaaba abandi omu kanisa nibootsyia nari nibafuka, okiri ahari eryo Iziba.

Ahabw'enki nootoorana enkora eya ira y'ekigombe ky'ediini n'ekiziba, ekijjwire ebiriiririzi n'ebindi byona, kandi okanywa ahari ekyo kintu ekiterami ky'ebiyagaana aho, kunu orikwetwa kwija aha Nshuro, Eiziba eritarikwoma?

83 Ninteekekateeka oku yaabaire egatsindika, kandi gakairuka, kandi-kandi gakaborogota, kandi gakasheka, kandi gakashemererwa, kandi gakataraka, kandi garigye gateefereireyo. Nihafuka, enjura nydingi; nihootsyia, hoomire, ensi yoona obu yaabaire neeyoma, ekaba neeborogota nk'oku yaabaire ekora burijio. Habw'okuba ekaba neeruga hare, omu itaka, hare okwo omu nkiri ei yaabaire neeruga.

Oo, ka ntuure haihi n'egyo Nshuro! Mutware enkora zaanyu zonna ezikozirwe abantu ezi murikwenda, amaziba gaanyu goona aga ira agaterami g'ebiyagaana, kwonka ka mpikye aha . . . nimmanyisa ebiziba ebiterami by'ebiyagaana. Kwonka, ka nyije ahari egi Nshuro, ka nyije aho ahu Aijwire. Niwe Kushemererwa kwangye. Niwe Mushana gwangye. Niwe-Niwe Maani gangye. Niwe Maizi gangye. Niwe Magara gangye. Niwe Mutambi wangye. Niwe Mujuni wangye. Niwe Mugabe wangye. Byona ebi ndikwetenga nibishangwa Omurikiye. Ahabw'enki ndikwenda ngu nze aha kindi kintu kyona?

84 Ow'eishe-emwe, ow'eishe-emwekaza, toija ahari egi Nshuro ekiro eki? Toija, ku oraabe otakagihikagaho, Togyakiira ekiro eki obwo nitwinika emitwe yaitu?

Ebiziba ebifumukire, birikujwa, birikutoonya, ensi neetoonyookyeramu, oburofa kuruga aha nju zamatungo hamwe n'obw'ebindi biro. Ahabw'enki ritari eri Iziba, eri ebyo binto bitarikubaasa kugumamu, egi Nshuro enku eijwiremu Eshagama, erikuruga omu mitsi ya Emanueli? Ahabw'enki otarikwakiira egyo ekiro eki? Ninshaba ngu Ruhanga atuhwera ekiro eki, omuri egi nsi eyomire, erikurusya. Nk'oku nabi yaagizire ati, "Niwe Rukiri omu nsi erikurusya." Niwe egyo Nshuro. Timwija Ahariwe ekiro eki, omu mitima yaanyu, twaba nitushaba?

85 Tataitwe omukundwa ow'omu Iguru, tihariho ndiijo Nshuro, nk'oku ekyeshongoro kirikugamba kit, "Tihariho endiijo nshuro ei ndikumanya; kureka Eshagama ya Yesu." Nkazaarirwa aho, naayororerwa aho, niinyenda kutuura aho, kandi nfeere aho, kandi ngarukye nzookyere aho, omu Kubaho Kwe. Mukama, reka burijio, ngume omu Kubaho Kwe, ahakuba tihariho handi ahu ndikumanya. Tihariho nyikiriza y'ediini, tihariho rukundo; tihariho rukundo kureka Kristo, tihariho nyikiriza y'ediini kureka Kristo, tihariho ekitabo kureka Baiburi, tihariho ekindi kintu kyona, tihariho okushemererwa aheeru Ye. Waamunyihaho, Ai Ruhanga, tindikufayo n'obu naakutunga eby'ensi ebirikwingna ki, nabwo bi-bikaaba bifire, nkaazengyerera aho nyekoreire emikono. Waamunyihaho, ebyangye nibihwa, Mukama. Kwonka Yaaba ari omuriinye, obwo Okwaikumi-na-eibiru nikuba nikushememeza nk'Okwakataano, obwo nihaba hatariho emyanya erikwotsya kandi nihaba hatariho emyanya eyomire, na rufu yo yonka neeba eteine businguzi. Ka Tumutungye, Taata. Muhe, buri mwikiriza ori hanu ekiro eki, omu bwingi munonga, nk'oku baategyerereza omu kishengye eki.

Baingi omuribo nibateekwa kuvuga orugyendo ruraingwa ekiro eki, baaba nibaza omu maka gaabo, mbwenu reka oku kube okuteekateeka kwabo ngu, "Ntwire ahari egyo Nshuro. Niho ntwire, ninywa amaizi marungi, buri shaaha."

Kandi ku baraabe batakaturgire ekyo, n'okuhitsya hati, ka Bamwakiire hati, kugira ngu babaase kugyenda n'egyo Nshuro. "Niinyija kugyenda naimwe; Niinyija kuguma naimwe okuhitsya obu ensi egi erihwaho." Tuhe ebantu ebi, Taata.

86 Kandi hati obwo twinikire emitwe yaitu, hariho omuntu omunda hanu, ekiro eki, nari nibangahi abarikubaasa kugira bat, "Mukama, ntware ahari egyo Nshuro hati hati. Tinkajaga hanu kuhurikiza kwonka; niinyija hanu kusherura Ekintu. Naija hanu Kukusherura, Mukama. Ninkwetenga ekiro eki. Ija omu mutima gwangye hati hati.

Nooza kukikora, Mukama?" Ruhanga akuhe omugisha. Mukama abahe omugisha mwena.

87 Taata, Waareeba egoy mikono, nangwa n'ahaiguru n'okwetooroora ekisiika, kandi n'omu bindi bishengye, aheeru. Wa-Waagireeba, Taata. Ni-ninshaba ngu Obahe byona ebi barikwetenga. Obundi batwire nibanywa aha kiziba nanka ekya ira, Mukama, okwemereraho rwagati omu rugyendo ahu omuntu yaatimbire ekiziba, ekisiisirwe n'enyegeyesa z'ebishuba z'emiringo yoona, nibahakanisa Ekigambo. Ninshaba, ai Ruhanga, ngu ekiro eki baije ahari Ogwo Ori egoy Nshuro, egoy Nshuro y'Amagara. Kituhe, Taata. Nimbakukwatsa hati omu Iziina rya Yesu.

Kandi Okangira oti, "Ku orishaba ekintu kyona omu Iziina Ryangye, kiriyakorwa." Hati, eki tinkaakishabire, Mukama, ku naakubaire ntarikuteekateeka ngu kikaakorwa. Nkaaba-nkaaba ninkigamba nk'omugyenzo gw'obutoosha. Kwonka nimbashabira, mpamize. Nimbashabira, niinyikiriza ngu Noobaha ebi Waaraganiise.

Kandi hati nimbaiha ahari ekyo kiziba omwebazyo ogu. Nimbaiha omu mwanya ogu batwire nibanyweramu, batarikumarwa; kubahitsya aha Nshuro egi. Ninkikora omu Iziina rya Yesu Kristo.

88 N'Abaawe, Mukama. Ka Bakunywego, Amaizi g'amagara, Enshuro y'Amaizi g'amagara. Naakishaba, omu Iziina rya Yesu. Amiina. Kitukorere, Mukama.

Oo, okuhimintika kw'omuhendo
Okurikunyozya nkeera nk'orubaare;
Tihariho nshuro endijo ei ndikumanya,
Shana Eshagama ya Yesu.
N'enki ekyakunyozyaho ebibi byangye?
Shana Eshagama ya Yesu;
N'enki ekyakugaruka kunkiza?
Shana Eshagama ya Yesu.

Ai, Yesu, tambira aba, Mukama! Kikore, Mukama, kurabira omu Iziina rya Yesu. Ninshaba, ai Ruhanga, ngu . . . ? . . . Noomanya ebantu byona.

Tihariho endijo nshuro ei ndikumanya,
Kureka Eshagama ya . . .

Kiteekateekyeho, tihariho endijo nshuro ei ndikumanya! Tindikumanya ekindi kyona kureka We. Tindikwetenga kumanya ekindi kyona kureka We. Tikiriho kureka Eshagama ya Yesu! Oo!

Oo, okwo kuhimintika kw'omuhendo
Okurikunyozya nkeera nk'orubaare;
Tihariho endijo nshuro ei ndikumanya,
Kureka Eshagama ya Yesu.

89 Obwo turiyo nitweshongora ekyo ogundi murundi, ka tukwatane omu ngaro. Nimukundana? Hariho omuntu ori hanu oine eki arikufa n'omuntu weena? Ku araabe ariho, gyenda okiteereze. Nooza kukiteereza? Ka turekye kuruga hanu tutyo. Mwareeba? Ku oraabe oine eki orikufa n'omuntu weena, gyenda okiteereze, hati hati. Hati hati nibwo bwire bwawe obuhikire bw'okuzayo, kandi okagira oti, "Ow'eishe-emwe, ow'eishe-emwekazi, haine eki naakugambireho, nkateekateeka ekintu. Ekyo nkaba ntamanyiise kukikora. Nsaasira." Mwareeba, ogwo nigwo muringo gw'okukikora. Ka tugire Enshuro rwagati yaitu, obwire bwona. Mwareeba?

Tihariho endijo nshuro ei ndikumanya,
Oo, kureka Eshagama ya Yesu.
Oo, okwo kuhimintika kw'omuhendo
Okurikunyozya nkeera nk'orubaare;
Tihariho endijo nshuro ei ndikumanya,
Kureka Eshagama ya Yesu.

Oo, t'Ow'okutangaaza? Tihariho endijo nshuro! Titurikuza kweshiisha n'ebindi bintu. Twetaaniise, twatsiga ensi enyima. Titukyenda zaakatunguru-cumu za Misri ezindi hamwe n'ebiziba ebifumukire. Turi omu rugyendo na Mukama Yesu, orwo Rukiri orwateirwe, amiina, niturya Emaanu erikuruga omu Iguru, kandi nitunywa; niturya Eby'okurya bya baamaraika, kandi nitunywa aha Rukiri. Amiina!

Tihariho endijo nshuro ei ndikumanya,
Kureka Eshagama ya Yesu.
Hati ka twinikye emitwe yaitu.

90 Ninshaba ngu mwena Ruhanga abaheere kimwe omugisha mwingi, ngu embabazi Ze n'okusaasira bigume naimwe omu saabiiti erikwija. Kandi ekintu kyona ku kyakubaho, ngu omwe omuriimwe akabaasa kushobooka aza enyima y'omukingo hati, oijukye n'okugwejegyeraho eshaaha nkye zonka n'okahuumuraho okuhitsya obu turaareebane. Oijukye, ngu, "Abo abahuriire abarishangwa bakiraho tibaribandiza abo abagwejegyeire, ahakuba Enzamba ya Ruhanga, egoy Nzamba y'aha muheru . . ." Eya mukaaga nibwo eherize kugamba. Kandi egoy Nzamba y'aha muheru, nk'Akamanyiso k'aha muheru, kuryaba Okwija kwa Mukama. "Eryagamba, kandi abaafeereire omuri Kristo nibo baribanza kuzooka." Bahuumwire okuhitsya obwire obwo.

Kandi ku waakushasha, oijukye:
Twara Eiziina rya Yesu,

Nk'engabo y'okukukingira buri mutego;

Okwohibwa ku kureeyongyere kukwetooroora,

Itsya eryo Iziina erirkwera omu kushaba. (Baadaimoni nibaija kuhunga.)

Mwijukye, twine amatsiko g'okubabugana hanu Sande erikwija akasheeshe. Mureete abarwaire n'abarikubonabonesibwa. Ninja kuba nimbashabira. Munshabire hati. Nimuza kukikora? Mugire muti, "Amiina." [Abateeraine baagira bati, "Amiina." -Omur.] Ninja kubashabira, kugira ngu Ruhanga abahe omugisha.

... Eiziina omu kushaba.

Eiziina ry'omuhendo, Eiziina ry'omuhendo, O, ka ni rirungi!

Matsiko g'ensi n'okushemererwa kw'Eiguru;

Eiziina ry'omuhendo, O, ka ni rirungi!

Matsiko g'ensi n'okushemererwa kw'Eiguru.

Nitwinamira Eiziina rya Yesu,

Nitugwa turambiire aha bigyere Bye,

Omugabe w'abagabe omu Iguru nitwija Kumujweka ekirunga,

Orugyendo rwaitu ku rurihwa.

Eiziina ry'omuhendo, Eiziina ry'omuhendo, (tikirungi kandi eky'omuhendo?)

Matsiko g'ensi n'okushemererwa kw'Eiguru;

Eiziina ry'omuhendo, Eiziina ry'omuhendo, O, ka ni rirungi!

Matsiko g'ensi n'okushemererwa kw'Eiguru.

91 Burijo kigumire munonga kubarugaho. N'obu ndaabe nimmanya ngu nimutsya, kwonka hariho ekintu aha . . . Reka tu, ogundi mushororongo gw'ekintu nanka, nimukikora? [Abateeraine baagira bati, "Amiina." -Omur.] Nimukikora? Omurunga Ogurikuboha Guheebwe Omugisha, ow'eishe-emwekazi. Nibangahi abarakumanya ekyo kyeshongoro ekya ira? Tukaba tukyeshongora, obwire buraingwa obuhingwire.

Kandi naaba nintekateeka, ekiro eki, "emikono ebiri, omu magana g'abantu, abatsigaireho," obu twabaire tweshongora ekkyo kyeshongoro omuri tabirinaakuru, reero omwe akwata omukono gwa mugyenzi we. Omurunga Ogurikuboha Guheebwe Omugisha. Nziikire baangi aharibo, eruguru hanu omu irimbo. Bategyereize. Ndyagaruka mbareebe. Obumwe n'obumwe, mbareeba, omu kworekwa, naareeba enyima y'omukingo. Bariyo.

Ka twinikye emitwe yaitu hati turiyo nitweshongora.

Omurunga Ogurikuboha Guheebwe Omugisha,

Emitima yaitu omuri rukundo y'Abakritaayo;

Okukwatanisa . . .

Ni nk'okw'omu Iguru.

Hati gorora omukono reero okwate ondijjo omu ngaro.

. . . twataana,

Hati inika omutwe gwawe.

Nikitureetera obusaasi omunda;

Kwonka nabwo nituguma tukwataniise omu mutima,

Kandi twine amatsiko g'okugaruka kureebana.

Twinikire emitwe yaitu. Ningarura saaviisi omu mikono y'omuriisa hati, reero asiibuure omu . . .



www.messagehub.info

Obutumwa obu bukabuuirwa
William Marrion Branham
 "... omu biro by'eiraka ..." Kush 10:7